

بالقاز حربنده

عساکرم مغلوبیتامز ان سبک

[نه دن منہزم اولدق] اثرینک قسم نائیسیدر.

محرری :

۱

طابع وناشری :

تجارزاده : ابراهیم حلمی

استانبول

کتابخانه اسلام و عسکری

۴۶ — باب عالی جاده سی — ۴۶



بالقان حربنده

عسکر مغلوبیتامز اسیر

[نهدن منہزم اولدق] اثرینک قسم نانیسیدر.

محرری :

۱.

طابع وناشری :

تجارزاده : ابراهیم حلمی

استانبول

کتابخانه اسلام و عسکری

۴۶ — باب عالی جاده سی — ۴۶

کتابخانہ اسلام و عسکری

تجارزادہ : ابراہیم حلمی

تَدَارُكُ مِنْهُرِ اَوْلَادِكُمْ

ایکنجی قسم

حرب اٹاسندہ کی سبیلر

۶

سفر برلکده کی خطالمرز

اصولاً ، مبادیء حرب سفر برلک و سوق الجیش تجمی نامیلہ ایکی مختلف صفحہ دن مرکبدر . سفر برلکده ، قطعات حال حضریدن موجود سفری یہ ابلاغ اولونور ؛ بونک ایچون اقتضا ایدن ضابطان ، افراد ، اسلحہ ، جیخانہ ، حیوان ، آرابہ ، البسہ و سائرہ مملکت داخلندہ بولنان بالجملہ منابعدن استفادہ ایدہرک تدارک ایدیلیر . سفر برلکہ مباشرت اولوندیغی آندن اعتباراً ممالک اجنیہ دن مواد حربیہ تدارکی اکثریا ممکن دکلدر . بونک ایچون خارجدن مبیاعہ سی ضروری اولان موادک وقت حضرده تدارکی لازمدر ؛ فقط بعض شیلر وار درکہ بونلری حضر زمانی اردوده بولوندورمق ، اوزون صلح سنہ لرندہ آغیر مصارفی موجب اولور ؛ مثلاً فضلہ افراد ، حیوانات ، آرابہ لر کبی ... بعضیلری ده مرور زمانلہ بوزولور : جیخانہ

و ارزاق کبی ... بو کبی مواد ، قسمأ حضر زمانی الده بولوندورلورسه ده ، مهم بر قسمنك سفر بر لکده تدارکی ضروریدر . سفر بر لکده تدارك اولونا جق شو قسمنك بهمه حال مملکت داخلنده موجود ویا اعمالی قابل اولماسی لازمدر . سفر بر لکک سرعت وانتظامله جریان ایتمه سی ایچون صلح زمانی ، سفر بر لک پلانلرینک غایت دقتله و منابع مملکتی ایی تدقیق ایده رک تنظیم ایدیلمسی و طابورلره وارنجیه قدر هر قطعه نك کندی سفر بر لکی ، مافوق مقاماتدن کلن اساسلره توفیقأ احضار ایتمه سی اقتضا ایدر . طابوردن اعتبارأ بالجمله قطعات قوماندانلریله قرارگاهلر ، اصولأ سفر بر لکک اعلانی آندن سفر بر لکک اکلانه قدر یاییلاجق ایشلری مین بر پروغرام یاپارلر و بوکا (سفر بر لک تقویمی) ویا (سفر بر لک مخره سی) دینیر . دهاوقت حضرده کمال دقتله ترتیب اولونا جق بو تقویم ، سفر بر لکک اعلانیله برابر همان موقع تطبیقه وضع اولونور و سفر بر لک ، کاملاً ، بو تقویم موجبجه جریان ایدر .

سفر بر لکک اکلندن سوکرا (سفر پلانی = حرکات حربیه پلانی) موجبجه قطعاتک ایجاب ایدن نقاطه سوق و نقلنه باشلانیرکه بوکا (سوق الجیش تجمعی) نامی ویریلیر . کرک سفر بر لکک و کرک تجمعک ممکن اولان صوک سرعتله و فقط انتظامی اصلا غائب ایتمه یه رک اجراسی فوق العاده فائده لیدر ؛ چونکه دشمندن اول سفر بر لک و تجمعمزی اکلانه موفق اولورسه ق

دهادشمن حاضر دکل ایکن اونک اوزرینه یورویهرک سفر برک و تجمعی اخلال ایتمک و هنوز حربه حاضر لانتامش ایکن اونی پریشان ایتمک قابل اولور (سوق الجیش باصقینی).

تاریخ حربجه مثبت و محرب وقایعدندرکه ، سفر برک و تجمعی اکمال ایتمدن محاربه ایدن اردولر اکثریا مغلوب اولورلر و بو مغلوبیتده دائمناهنه قدر توالی ایدر و حربک تمامیه غائب اولماسنی موجب اولور .

مع التأسف ، بزم سفر برلکمز شو قواعدده اصلا توافق ایدممدی ؛ چونکه منطقه اصولی جاری اولمادیغندن و بوتون غارنیزونلر روم ایلییه بیغیلیمش بولندیغندن هر قطعه نیک سفر برلکی عینی زمانده اکمال اولونامادی . مثلاً ، قسطنونی ولایتدن بعض ردیف طابورلری ، فوق العاده بر غیرت و ظنیر-ورانه کوستره رک اوچ کونده سفر برلکیرینی اکمال وسفر برلکک آلتنجی کونی قره دکز ساحلنه کله رک کونلرجه واپوره انتظار ایدیلر . بوکا مقابل اک کزیده قول اردولر من سفر برلکک یکرمنجی کونی هنوز اکمال افرادینی تماماً آلامش ایدیلر . حتی (قرق کلیسا) میدان محاربه سی اجرا اولونورکن اوچنجی قول اردویه منسوب کلیتلی اکمال افرادی (قرق کلیسا) شهرنده سلاحسز بکله یورلردی ؛ کذا ایکنجی قول اردو حربک نهایتنه قدر اکمال افرادینی تماماً لایامادی . شایان تأسف بر حال اولمق اوزره ، طربزون ردیف فرقه سی طابورلری ده سفر برلکک

یکرمنجی کونی هنوز (٤٠٠:٦٠٠) موجودینه بالغ اولمشلردی!...
 بر قاچ سنهدن بری آردی آرقه سی کسيلمه ين عصيانلری
 تأديب ایچون بعض ردیف فرقه لری مکرراً سلاح آلتنه آلمش
 ایدی . بویله حضور وراحتی صیق صیق سلب ایدیجی دعوتلر ،
 افراد ردیفه یی خیلی بیزار ایتدیکندن عمومی سفر برلکده کی
 بطائتک بر قسیمی ده بوکا حمل اولونابیلیر .

سفر برلکک بویله هر قطعه ایچون غایت مختلف اولماسی ،
 سفر برلککه سوق الجیش تجمعنی آیری آیری اجرایه مانع اولدی .
 ذاتاً دمیر یول خطوطنک و واپورلرک آزلیغی سفر برلککه تجمعی
 گرفت اولارق اجرایه مجبور ایدیوردی .

سریع سفر بر اولانلرک همان تجمع منطقه سنه نقلنه باشلاندى؛
 شبهه سز بو حرکت، شرائط مسروده تحتنده جائز و ضروریدر؛
 فقط بعض قطعه لر، مثلا شرق اردوسنه منسوب سواری فرقه سی
 و ایکنجی قول اردو ، هنوز سفر برلکلرینی اکیال ایتهدن
 تجمع منطقه سنه نقل اولوندی که بو ، غایت مضردی .

عینی حال ، ١٨٧٠ سنه سنده فرانسزلرک فلاکتلرینی
 انتاج ایدن مؤثرات اصلیه دن بری ایدی . مذکور (آلمان -
 فرانسز) حربی ، تاریخ حرب تدقیقاتی میاننده بزده اک زیاده
 اوقونان ، او قودولان ، تدقیق ایدیلن و حتی تقلیدینه هوس
 اولونان بر زمین ایکن فرانسز اردوسنک فلاکتدن عبرت آلاما-
 مشر ! مع التأسف غالب اردویی تقلید ایدم دیرکن مغلوبک

فلاکتلر دوغوران حرکاتی ، عادتا بر سینه ماطوغراف صحتیه
تکرارایتدک: عینی سفر برک خطالری .. عینی تجمع یا کلیشلقدری ..
نهایت بر آی ظرفده اردونک تمامیله پریشان اولماسی ... یالکز
بر فرق وار : ۱۸۷۰ سنه سنده فرانسزلرک ایمپراطورلق اردو-
لری محو و ایمپراطور اسیر اولونجه فرانسز ملتی ینه مغلوبیتی
عزت نفسنه یدیره مدی ؛ صلحه طالب اولمادی . همان جهو-
ریت اعلان و (غامبه تا) نک خارق العاده غیرت و متانتیه یکیدن
جمهوریت اردولری تشکیل و تجهیز اولونارق حربه دوام
ایدیلدی ؛ کرچه فن نقطه نظرندن بومقاومتک بر اهمیتی اول-
مازدی ؛ بیهوده چابالانمقدن عبارت ایدی ؛ چونکه علی العجله
جمع و تجهیز اولونان اهالیدن متشکل قطعاتک هیچ بر قیمت
حربیه سی اولامیه جغندن منتظم وتعلیم وتربیه سی یرنده دشمنه
قارشی غالب کللری غیرقابل ایدی ؛ فقط هر حالده فرانسز
ملتک یاشادیغنه ویاشایاجغنه دلالت ایدن فداکارلق ، متانت
ومحافظه ناموس غیرتی کبی خواص ومزایای مبجله آتارندن ایدی .
بز ، بالعکس همان صلحه راضی اولدق ؛ وبالاخره حربه تکرار
بدأ اولوندیغی زمان اولجه چاتالجه وبولایره قدر چکیلمش اولان
اردولرمز فرانسزلرک میلیسلری قدر اثر حیات و مهارت
کوستره مدی . فرانسز میلیسلری همان ایلری حرکت ایدوب
پارس محاصره سنی رفعنه شتابان اولمش و کندیلرینه نسبتله قات
قات مکمل اولان آلمان اردولریله صحرا محارباتی اجرا ایتمشلردی .

زده نه ملت یکیدن بر اردو تشکیل ایده بیلدی و نه اردو یکی
برجرات کوستره بیلدی .

سفر برلك بطاقتی تولید ایدن الك مهم سبب بالاده عمومی
بر صورتده تعریف اولونان سفر برلك احضاراتك فوق العاده
نقصانی ، حتی فقدانیدر .

اساساً اردوده سفر برلك استحضاراتی بو کونکی اصوله
موافق صورتده بیلن و تطبیق ایدن همان هیچ یوق ایدی .
صورت عمومیده کرک ارکان حربلر و کرک صنوف سائر ضابطلری
مکتبدن چیققدن صوکر اترقیات عسکریه بی تعقیب ایتدکلرندن
ولاینقطع اکمال معلوماته چالیشما دقلرندن برقاچ سنه صوکر اهر
کس بیلدیکنی اونوتیور و خاطرده قالان شیلرده آرتق موداسی
کچمش ، کهنه له شمش مواد حکمنده قالیور ایدی . برنجی قسمده
ده بالمناسبه ذکر اولوندیغی اوزره ، اردوده صورت عمومیده
بالمله ضابطانی تزید معلومات و اقتداره اجبار ایده جک اصوللر
موجود دکلدی . هر هانکی بر صورتله آلمانیا به اکمال معلومات
ایچون کوندریلان ضابطانده ، اکثریتله ، عودتن برقاچ سنه
صوکر ا ، اسباب مذکوره تأثیریه ، دیکر لرندن فرق اولونامیه .
جق حاله کلیور لر دی ، بو کون مکتبلر مزده اوقونان مواد ،
کوستریلن اصول ایله اردوده ، حیات حقیقیه ده تطبیق و رعایه
یت اولونان اصوللر آراسنده کلی فرقلر موجود ایدی . اهلیت
نظر دفته آلمانیه رق منحصر آرتبه و قدم تأمل اولوندیغندن

مهم و معتنا مأموریتلره نصب اولونانلر اکثریتله موقعلرینک طلب ایتدیکی معلومات ووقوفه مالک دکل ایدیلر ؛ و بو وقوفه فسزلق یوزندن مملکتی غیر اختیاری فلاکتلره سوق ایدیورلردی . ایشته آنجق ، کرک ترقیات حاضره عسکریه یه و کرک احوال مملکته درین بروقوف و دقتی برچالیشمق ایله یاپیلماسی ممکن اولان سفر برک استحضاراتی ده ، بالاده کی اسباب حسیلله عادتاً معدوم ایدی . یاپیلان بعض استحضارات اکثریتله فائده یرینه مضرت تولید ایده جک مواددن معدود ایدی . همان هیج برقطعه وقرارگاهک سفر برلکی ، وقت حضرده تنظیم ایدلمش اولماسی لازم کلن سفر برک تقویمنه کوره جریان ایتدی . سفر برلکک ایکنجی و اوچنجی هفته سنده ایشلر او قدر قاریشدی که ا کمال افرادی و مکاری نامنه درسعاده کلن گروه و سورو راست کلن قطعه یه سوق اولنیور و یا تجمع منطقه سنه کلیشی کوزل کوندریله رک اوراده هر هانکی برقطعه یه باشدن صاومه قیلندن و یریلیوردی . نه افراد قطعه سنی بیلور ، ضابطانی طانیوردی ؛ نه ضابطان افرادی تشخیص ایده بیلور ، هانکی مملکتدن اولدقلرینی بیلوردی . هر کسده بر عجمیلک ، بر یابانجیلق ... هر هانکی بر محاربه نک تأثیریه قطعاتک ارتباطی آزاجق بوزولدومی ، آرتق برداغنیلق و قارمه قاریشیلق ... ایپ اوجنی بولمق قابل اولمایوردی . ایشته بوتون بوقاریشیلقلر منطقه اصولنک غیر موجودیتدن و سفر برک استحضاراتنک عدم مکملیتدن انبعاث ایدیوردی .

وقت حضرده موظف قطعاتک قسم اعظمی روم ایلی یه دولدریش اولدیغندن بونلرک سفر برلکنی تسریع ایچون ردیفلردن استفاده تقرر ایتشدی : روم ایلیده بولونان بالجه احتیاط و ردیف افرادی ، موظف قطعاته اکیال افرادی مقامنده سوق اولونارق اونلرک موجودلرینی مقدار سفری یه ابلاغ ایده جکلردی . احتیاطلر اساساً بو وظیفه ایله مکلفدر ؛ غارنیزونلرک روم ایلیده بولونماسی اساسنه کوره برنجی صنف ردیفلرکده احتیاطلر کبی استعمالی هر سنه تعلیم ایچون سلاح آلتنه چاغیر یلق شرطیه قبول ایدیله بیلیر ؛ فقط ایکنجی صنف ردیفلرک موظف قطعاته بر آراده برنجی خطده استخدانه قطعاً جواز ویریه مز . بوجنس افراد معینزلردن عبارتدر . بونلر هیچ تعلیم کورمه مشدر ؛ عائله قایغوسیه اندیشه نا کدر . اونلری آنجق مستحفظ قطعات مقامنده قوللانمق ، منزل خطرلنده ، دمیر یول محافظه سنده ، حرکات حربیه ایچون حائر اهمیت اولمایان حدودلرک ترصد و محافظه سنده ، قلعه مدافعه سنده استخدانم جاژدر . حال بوکه افراد مذکورده موظف قطعاته مزج ایدیله رک سیار اردویه ادخال اولوندی ؛ حتی قسماً موظف قطعاته اکیال افرادی مقامنده ویریلدی . وبو اردودن بالا آخره ، آلمان جنراللرینک بیله کندی اردولردن طلبده تردد ایده جکلری بوظیفه ، مشکل وضعیت ایچنده تعرض ایسته نیلدی ...

ذاتاً استبدال زمانی ورود ایتمش اولان افراد موظفه سفر برلکدن برار اول ترخیص ایدلمش اولدیغندن قطعات موظفه نك موجودلری پك آزماشدی . برده بوجنس تعلیم و تربیه سی آز ویامفقود خلق ایله ا کمال نقصانه چالیشینجه قطعات مذکور نك قیمت حربیه لری پك چوق تنزل ایتدی . وقت حضرده اوچر بولو کدن مرکب اولان پیاده طابورلری سفر برلکده دردر بولو که ابلاغ اولونا جقدی . اکثری قطعات بوکاده دقت ایتدی ؛ قادرو بولوکلری تام بولوک حالنه تحویل ایتمه دیلر .

سواری قطعاتی معنای حقیقی سیله اصلا سفر بر اولمادیلر . اردو سواری سنی تشکیل ایده جك آایلرک اکثری سی موجود حضریلریله همان حدوده سوق اولوندیلر . متباقی آایلر ، صورت عمومی ده هر قول اردویه بردانه اولمق اوزره ، فرقه سواری سی مقامنده توزیع ایدیلدیلر . سواری آایلرینه هر سنه منتظاماً و معین مقدارده عجمی حیوان اعطاسی اصولی تأسیس اولونا . مادیغندن سواری قطعاتنك حضری موجودلری پك مختلفدی ؛ ا ک دولغون موجودلی سواری بولوکلری ، مقداری محدود اولمق اوزره ، ۸۰ : ۹۰ حیوان قوتنده ایدیه ده بعضاری ۴۰ حیوان موجودینه قدر دوشوردی . حال بوکه نظام مخصوصی موجبنجه سواری بولوکلرینك حضری موجودلری ۱۲۰ حیوان اولاجق ایدی ؛ سفر برلکده ده بو بولوکی نوبتی حائر اولان بولوک ، دیگر درت بولوکه افراد و حیواناتی ویره زك

اونلری سفر بر موجوده ابلاغ ایلیه جك وکندیسی ده پو بولوکی اولمق اوزره بولوندینی یرده قالا جقدی! . . هر حالده قرقر آتلی قوتنده پك چوق سواری بولوکی کوندرمکن ایسه مثلاً ۱۲۰ شر آتلی موجودنده آز سواری بولوکی کوندرمك وفضله قالان ضابطان و کوچوک ضابطانله برلکده بولوکلری ده پو بولوکی مقامنده استخدام دهامناسبدی. بوده پو بولوکلری هر طرفدن کله جك سواری احتیاط افرادینی، عجمیلری و سواری یه الویریشلی حیواناتی بر آتربیه ایده رك صره یه کیره جك حاله کتیرلر و سفر بر بولوکلرک نواقصنی ا کمال ایدرلردی! . . بر قاچ مستنساندن صرف نظرله، علی العموم ارکان، امرا و ضابطانک نظاماً دهها وقت حضرده بسله مکه مجبور اولدقلری حیوانات اصلاً موجود دکلدی. وقت حضرده بو حیواناتی تدارک ایتدیرمک ایچون همان هیچ بر تثبث وقوعه کله دی . سفر برلکله برابر هر کس سواری و طوپچی آایلرینه ویا پیاده قطعاتی ایچون تدارک ایدیلن مکاریلره قوشارق بر حیوان چکدی؛ و شو صورتله سواری و طوپچی آایلرینک حیوان موجودلری بوس بوتون آزالدی .

منحصراً ردیف فرقه لرندن وجوده کتیریلن قول اردو- لرده یالکز بر قاچ بولوک سواری ایله بر قاچ باطاریه طوپچیدن باشقه موظف قطعات و افراد یوقدی . ردیف فرقه لرینه تخصیص ایچون کفایت درجه ده طوپچی قوتی موجود دکلدی .

گرچه مانتللی طوپلر وار ایدی ؛ فقط سفر برلکده بونلره ضابط ، افراد ، حیوان و تجهیزات سائره بولمق عدیملامکان ایدی . مملکتک حیوان منابعی زنکین ایسهده دارالحربدن وموظف قضاغات غارنیزونلرندن پک اوزاقده ایدیلر . بونکله برابر یرلی حیوانات ایله باطاریه لری قوشمق مشکل ایدی ؛ چونکه علی الا کثر یرلی حیواناتک ارتفاعلری ۱،۴۰ متره وودها دون مقدارده اولوب طوپ قوشومی اولغه الویریشلی ایری جتهلی حیوانات نادر ایدی . حرب ایچون انسانلر قدر حیواناته دخی احتیاج اولدینی محقق ایکن جنس فرسی اصلاح و تکثیر ایچون جدی تشبثات واقع اولمامشدی . بر زمانلر افراد اها لیدر عبارت ، میللیس حالنده کی عثمانلی و تاتار سواریلری وسطی اوروپایی تیتره تمش اولدینی حالده شیمدی دکل اهالی ، وظیفه و مسلک جهتیله مجبور اولان ضابطان بیله آته بینمکه ، آت بسله مکه رغبت ایتمه یورلردی . مشهور جهان اولان انکلیر آتلیخی اصلاح ایدن طایلر مملکت مزدن ساتون آندیخی حالده بز سواری و طوپچی ایچون مملکت مزده حیوان بولامایور ویا بولمق چاره سنه توسل ایتمه یوردق ...

سفر برلکده طوپ قوشمغه الویریشلی حیواناتک کفایت درجهده بولونامایاجنی تأمل اولونارق سفر برلک پلانلر ننده یالکیز موظف باطاریه لری سفر بر ایتمک نظر دفته آلمش ایدی ؛ بناءً علیه مذکور پلانه توفیقاً اوچر طابورلی صحرا طوپچی

الایلرندن اوچنجی طابورلر آلهرق ردیف فرقه لرینه ویرلدی .
 کذا قول اردولرده کی مستقل جیل طابورلری ده اکثریتله
 مذکور فرقه لره تخصیص اولوندی . فقط ردیف فرقه لرینک
 مقدار یله بو طوچجی طابورلری بیننده ، ده دوغروسى ، ردیف
 تشکیلاتیه موظف قطعات تشکیلاتی بیننده هیچ بر آهنگ
 و توافق موجود اولمادیغندن ردیف فرقه لری ایچون معین بر
 نظام حرب تقرر ایتدیر یله مدی .

سریع آتشی صحرا باطاریه لری وقت حضرده صورت
 عمومیه ده ۴ طویله ۲ : ۴ جیخانه آرابه سی قوشابیلورلردی .
 متباقی ایری قوشوم حیواناتی سیوک شهرلرده کی آرابه بارگیر-
 لرندن ا کمال ممکن ایدی ؛ فقط بو خصوصده وقت حضرده کی
 سفر برلك استحضاراتی پك ناقص ایدی . هر آلی کندینه
 مقتضی طوپ قوشوم حیواناتی زه دن آلاجغنی بیلمه یوردی .
 بالخاصه پای تخته ده بولونان ایری قوشوم حیواناتندن تکمیل
 برنجی اردو مفتشلکننده کی طوچجیلری سریعاً سفر بر ایتک
 ممکن ایدی ؛ فقط استحضاراتک نقصانی ، حکومت ایله دوائر
 بلدییه و اهالینک بینمزده باطلا مقاوزه بولونان فلا کتی وقت
 و زمانیه ادراک ایده رک اهالی یدنده کی وسائط نقلیه یی سریعاً
 جهت عسکریه یه تسلیم ایتمه لری طوچجیلرک سفر بر لکنی پك
 زیاده تأخیر ایتدی . گرچه بعض حمتلی وطنداشغر ،
 حیوانلرینی دکل کندی اللریله تسلیم ایتک ،

حتی هدیه ایتک درجه سنده ابراز فداکاری ایتدیلر ؛ فقط پک چوقلری حیوانلری صاقلادیلر ؛ تدارک وسائط نقلیه قومیسوئلری بوحال مواجهه سنده جبراً تحرییه و سوقاقدیه کچن آرابه لری توقیفه مجبور اولدیلر. حکومتک لزومی درجه سنده متانت ابراز ایتهمسی ، بعض اکابر رجال دولتک بیله کندی آرابه بارکیرلرینی قاپدرماق ایچون التماس طلب ایلملری ، بو مملکتک پاره سیله احیا اولمش ، مثلاً بوموتی بیراقا بریقہ سی کبی قومپانیه لک اللرنده کی حیواناتی ویرمه مک ایچون سفارتلره مراجعت ایدره ک مشکلات سیاسیہ احداث ایتلری حسیله جبراً تحریدن دخی بر ثمره مفیده حاصل اولمادی ؛ حال بوکه آرابه حیوانه جدأ محتاج ذوات وشرکتلر موقه یرلی قوشوم بارکیرلریله ایشلرینی تسویه ایده بیلیرلر ایدی .

تراموای قومپانیه سنک بیکی متجاوز مونس ، ادمانی حیواناتی بیله آلمقده رخاوت کوستریلدی . شهر اهالی سنک تراموایه احتیاجلری حسیله ۳۰۰ حیواندن فضیله آلمانسی ایچون بویوک مقاملردن قرارلر اصدار اولوندی ؛ وحریه نظارتک بو باده کی تشبثاتی عقیم بیراقلدی . استانبولده خطوط بحریه بویوک رول اوینارکن وبر خارجی تهلهکه مملکتی تهدید ایدرکن پای تخت اهالی سنک قسماً وسائط نقلیه دن محرومیتنی دوشومک پک غریبدر. نهایت قرق کلیسا فلاکتک فرداسنده یعنی سفر بر لکک یکر می ایکنجی کونی تکمیل تراموای خطوطک

تعطیلیه حیواناتك اخذینه موفقیت حاصل اولدی . حال بوکه بوايش وقت صلحه هردر لو تفرعاتيله احضار ایدیلوب سفر برلكك ايلك کونی موقع اجراه قونسهیدی ، ایکی اوج کون ظرفده یالکز تراموای حیوانلریله لا اقل ۳۰ باطاریه یی سفر بر ایتک ممکن ایدی . برنجی اردو مفتشلكنك متباقی باطاریه لرینی ده پای تخته کی ایری آراهه بارکیرلیله سفر بر ایتک قابلدی .

صحرا طوپچیلرینك خفیف جیخانه قوللری ایچون ماجارستانه سپارش ایدیلش اولان آراهه لر هنوز تمامیه کلمه مشلردی . عادی خفیف بارکیرلی آراهه لرله مذکور قوللری تشکیل ممکن ایکن بوکاده اهمیت ویریلهدی ؛ و صحرا طوپچی طابورلرینك قسم اعظمی خفیف جیخانه قولی ویریلکسزین سوق ایدلدی . حال بوکه سریع آتشی طوپلر ایچون باطاریه نك ۱۱ پارچه آراهه سنده کی جیخانه - طوپ باشنه ۲۱۲ آیم - آنجق بر کونلك محاربه یه کافی ایدی . (ژاپون - روس) حربنده کورولدیکی اوزره زمانمز محارباتی برقاج کون امتداد ایتدیکندن طوپچینك جیخانه سز قالاغنی تأمل اولونما یوردی ؛ نته کیم (لوله بورغاز) محاربه سنده طوپچی جیخانه سنك فقدانی سریع آتشی طوپلر مزی قوال طوپی منزله سنه ایندیردی . ایکنجی اردو مفتشلكنده کی طوپچی قطعاتی ده آجینه جق برحاله ایدیلر . اوراده کی طوپچی آلایرینی سفر بر ایدیه بیلمك ایچون یالکز سلانیک ، مناستر ، اسکوب کی برقاج شهرده

تدارک اولونا جق جزئی حیواناتدن باشقه بر منبع یوقدی .
 صحرا طویجی باطاریه لرینه حیوان بولمق مسئله سی بزی آتیا
 ده جداً اشغال ایده جک مهم بر مسئله در . یا صحرا طویجیلرینه
 داخلدن قوشوم حیوانی تدارکنی سرعتله تأمین ایتمه لی؛ و یا خود
 اکثریتی جبل طویجیسندن تشکیل ایده رک صحرا طویجی باطا-
 ریه لرینک مقدارینی آزالتمالی و بوباطاریه لرده ده ا حصر زمانی
 سفر بر موجود ایچون لازم کلن تکمیل طوپ کشان حیواناتی
 بسله مه لیدر . یوقسه ساده طوپ، جبخانه آرابه سی هیج بر قیمت
 حریبه نی حائر دکلدر .

نقلیه قطعاتنه کلنجه ، موجود اولان پلانلرک ، ده ا دو-
 غروسی تصوراتک هیج بریسی موقع تطیقه قونا مامشدر .
 گرچه مملکتده نقلیه قطعاتی تشکیله کافی مقدارده مکاری ،
 بارکیر آرابه سی ، اوکوز ویا ماندا آرابه سی بولمق قابلدی ؛
 وهان شوو سائط نقلیه نک چوغی جهت عسکریه جه آندی ؛
 فقط موظف نقلیه طابورلری تشکیلاتی منتظم و کافی اولمادیغندن
 سفر بر لکده احداثه چالیشیلان ردیف قول اردولری ایچون
 ارزاق و جبخانه قوللری تشکیله موفقیته حاصل اولمادی .
 بو خصوصده موظف قول اردولر بالطبع ده ا بختیار ایدیلر ؛
 فقط بونلرک نقلیه طابورلری ده وقت سفرده ارزاق و جبخانه
 قوللرینک عهده سنه دوشن وظائف مهمه نی ادراک و ایفا ایده-
 جک برحاله دکل ایدیلر .

داخل مملکتدن تدارك ایدیلن یوزلرجه مکاری و آرابه بر قاج انسان ایله برابر ردیف قول اردولرینه ارزاق و یا جبخانه قولی مقامنده ویرلدی ایسه ده نقلیه تشکیلاتی وجوده کتیره جک هیچ بر اساس موجود اولمادیغندن و بو یوللر ایچون اوتهدن بریدن طولانان ضابطان و افراد کری خدماتی حقنده هیچ بر فکره مالک بولونمادقلرندن صورت عمومیه ده نقلیه تشکیلاتی همان صفر اعتبارده قالمشدر .

سفربرك اعلان اولوندیغی زمان آرناوودلق عصبانی و ایتالیا حربی حسیله اکثری قطعات موقع اصلیلرنده بولونما . یوردی . برنجی قول اردونك برنجی فرقه سی شمالی آرناوود . لقه ایدی . سفربرك و تجمعی اخلاص ایتمهك ایچون همان سفربرك امریله برابر بونك درسعاده جلی لازم ایکن یاپیلما . دی ؛ نهدن سوکرا قرار ویریلدی ایسه ده ، آنجق بر آلاینی کتیرمک میدر اولدی . فرقه نك دیگر پارچه لری دارمه داغینق قالدی . ایکنجی قول اردونك اکمال افرادی و حیواناتی آنا . طولیدن کله جکدی ؛ فقط مذکور قول اردویه منسوب قطعات بالذات مأمور کونده ره رک افراد و حیواناتی سریعاً جلب تشبثنده بولونمادیغندن و اساساً معین بر ردیف منطقه سنک احتیاطلری کندیسنه تخصیص ایدیلش اولمادیغندن بو قول اردونك سفربرلکی سوک درجه تأخر ایتدی ؛ ونهایت سفربر اولمادن تجمع منطقه سنه سوق اولوندیغندن ایکنجی قول اردو حربک نهایته قدر

کندیسنه مقتضی ا کمال افراد و حیواناتی آلامادی . حال بوکه بو قول اردو برسنه دن بری ایتالیا حربی حسیله چاناق قلعه بوغازنده حال حربده بولونیوردی . ا کر بووظیفه حربه سندن دولایی سفر بر ایدیلش اولسهیدی ، بالقان حربی ایچون دها سفر بر لیک ایلک کوننده حرکت حاضراک مکمل بر قول اردو اولوردی ... بوندن باشقه برنجی قول اردونک ایکنجی فرقه سی ایتالیا حربی حسیله ازمیرده ایکنجی قول اردونک آلتنجی فرقه سی آطه لرده بولونیوردی .

اوچنجی و دردنجی قول اردولر کده اکثر اقسامی آرناو- و دلقده ، یمنده و یا ایتالیا حسیله چاناق قلعه ده بولوندیغدن بونلر کده سفر بر لیکری بالمجبوریه منتظماً جریان ایده مدی . ایشه دولت عثمانیه نک شرقی روم ایلده حرب ایده جک اولان اک مکمل درت قول اردوسی شو حالده ایدی ...

ماکدونیا جهتی ایچون سفر بر لک پلانی تشکیلات حضریه بی اصلا نظر دفته آیه رق موظف فرقه لرله ایکنجی صنف ردیف فرقه لرندن مرکب غریب برر خلیطه شکننده قول اردولر احداث ایدیوردی ؛ بناء علیه تنسیقات جدیدده قبول ایدیلن نظام حرب ، کتاب صحیفه سندن دیشاری چیقامایان سوسلی بر شکل حالنده متروک قالدی .

سفر بر لیکده یکیدن تشکیلات جسیمه یا بمق قدر مضر هیچ بر حرکت یوقدر ؛ بو قاعده یه رغماً وقت حضرده قادر و حالنده

بولونان ردیف فرقه لرینی بر آرایه کتیره دک ردیف قول اردولری تشکیله تشبث اولوندی . ظن اولونیوردی که اوچ ردیف فرقه سنی بر آرایه کتیره دک باشلرینه بر قوماندان ، بر قاچ ارکان حرب و یازیچیلردن مرکب قول اردو قرارگاهی ویرمکه بر قول تشکل ایدر [*] .

بوندن باشقه ردیف فرقه لری ایچون کفایت درجه ده صنوف معاونده یوق ایدی . اکثری ردیف قول اردولرینه ضعیف موجودلی بر سواری بولوکی ویرلدی . بونلر ایچون

[*] بومرتب ، دوشیرمه اصولیه متشکل قول اردولره تعیین اولونان قوماندانلر ، ارکان حرب رئیس لری وسائر ا اکثریتله بر قول اردونک نه صورتله ایفای وظیفه ایده بیاچه جکندن بی خبر ایدیلر ؛ بووقوفسزاک یوزندن حرب اثناسنده نه ائیم فلاکتلر وقوعه کلدی ؛ ایشته سزه بر مثال : ۱۷نجی قول اردوده احتمالکه محافظه اسرا اندیشه سیله ، قول اردونک نظام جربی ، هانکی قطعاتدن مرکب اولدینی اداره رئیسندن کیزله نیور ؛ کذا قول اردونک یاپاجنی حرکاتدن ، نره یه کیده جکندن معلومات ویریلیور . بووقوفسزلق ایچنده اداره رئیس یی کندی قول اردوسنه منسوب و اوچ کوندن بری آچ قالمش بر ردیف طاہورینه اکمک ویره میور . طاہور آنجی صامسون فرقه سنه منسوب اولدینی بیلیور ؛ اداره رئیس یی صامسون فرقه سنک کندی قول اردوسنه منسوب اولوب اولمادیغنی بیلمه یور ؛ کذا قول اردوسنک بولوندینی یردن خیری اولمادیغندن (چونقره - لوله بورغاز) میدان محاربه سنده قول اردوسنی بولامایارق یاننده کی ارزاق قوللریله برابر بیهوده یره دو- لاشیور ونهایت دشمن ائنه دوشه جک بر وضعیته کنجه ، عسکر بری طرفده آچ اولدینی حالده ، اوچ قافله ارزاق یاقغه مجبور اولیور ...

صحه تشکیلاتی ده همان هیچ یوقدی . تشکیلاتک قصوری ، جزؤ تاملرک داغینقلغی وسفر برلکده کی خطیئات حسبیله موظف قول اردولر سفری موجوده ابلاغ ایدیله مدیکندن تجمع منطقه . سنه اک ایرکن ورود ایدن ردیف فرقه لری ، سفر برلک پلا . ننده مصرح نظام حربلر نظر دقته آلمقسزین ، قسماً اکمال افرادی و قسماً قطعه حالنده موظف قول اردولر الحاق ایدیلدیلر . شو صورتله ردیف قول اردولری ده نظام حرب مقررہ کوره تشکل ایدمه مدیلر ؛ و محاربه لر بر برینه ولی ایتد . یکنندن الی نهایته قارمه قاریشق قالدیلر .

استانبولده آسایشک اخلال ایدیلسندن قورقان حکومت دارالحربه کیده جک قطعاتدن بعض جزؤلری افراز ایدهرک آلیقویدی . حال بوکه اطفائیہ طابورلری سفری موجوده ابلاغ ایدیلسهیدی ، هم استانبولک آسایشی محافظه ایدیلر وهم حربی اجرائیه تخصیص اولونان جزؤ تاملر پارچه لانازدی . بر حرب ایچون اک زیاده لازم اولان شی پاره در . مصارف عادیه یی قاپاتمق ایچون هر سنه عقدینی اعتماد ایدیندیکمز استقراضه ایتالیا حربی حسبیله ، ایکی سنه دن بری موفق اولامادق . بالقان حربی اثناسنده یینه موفق اولامایا جغمز بدیهی ایدی . سفر برلکک اعلانیله برابر همان داخلی بر استقراض ترتیب و اجرا ایدیلسهیدی ، بالآخره ما کدونیا ده دشمنلر مزک وبالخاصه قومیته جیلرک جبراً آلدق لری مدهش پاره لری بز بر طرز مشر .

و عهده طوپلایه بیلیردك؛ نتیجهٔ حرب اولدن كسديريله مزسه ده، ما كدونیا ده دشمن استیلاسنه تماماً مانع اولاماق آشكارایدی. استقراض داخلی، حكومتی كوچوك دوشوره مز. كائنات بیلوردی كه حكومت عثمانیه مصارفات عادیه سنی بيله قاپامق ایچون استقراض خارجیه مراجعت ایدیور. ژاپونیا دخی حرب اخیره دفعاتله استقراض داخلی عقد ایتشدی. حال بو كه سفر برلكه برابر استقراض داخلی عقد ایتك ویا موراتو- ریوم اعلان ایلك دكل، حرب مدتجه موقه و فقط منتظماً نصف معاش ویرمك، بعض لزومسز مصرفلری طی ایتك، حتی ضم معاشلری قطع ایله مك كبی تدابیره بيله توسل ایدیله دی. علی العموم ضم معاشلرك، یومیه لرك حاصلی معاش و تعیناتدن فضله ویریلن هر نوع تخصیصاتك قطعی دهها سفر برلكك ایکنجی هفته سنده محاسبات دائره سنده متشكل بر قومیسون طرفندن رسماً باش قوماندان وکیلی و حربیه ناظرینه تکلیف اولوندیسه ده مشارالیه قبول ایتدی. بوندن باشقه، کویا سعه مالیه مز پك واسع ایش کبی، باش قوماندانه ۳۰۰ لیرا، شرق و غرب اردولری قوماندانلرینه ۱۵۰ شر لیرا معاش و ۳۰ زر لیرا تعامیه تخصیص اولوندی. عجباً وقت حضرده کی ۱۲۵ لیرادن عبارت اردو قوماندانلغی معاشنی نهدن تزئیده احتیاج کورولدی؟ حربه کیدن سائر ارکان، امرا و ضابطان حضری معاش و تعینلریله اکتفا ایدرکن اردو قوماندانلریله باش قوماندان ایچون

بویله استثنائی بر معامله نك قبولی هر حالده دوعرو دکلدی .
 سفر بر قطعاتله برابر بولونان و صوکرادن الحاق اولونان بالجمله
 سیویل کاتبره معاشنک بر مثل ضم ویریلدی . فرضاً ۲۰۰۰
 غروش معاشلی بر کاتب سفر بر قطعه ایله برابر بولونجه ۴۰۰۰
 غروش آلمغه باشلادی . بومعامله لر مضایقه مالیه سی اولان بردولتک
 حالیه متناسب می ایدی؟ حاصلی بونلره مماثل لایعد ولا تحصا ترتیبات
 مضره سببیه اساساً موجود مضایقه مالیه فوق العاده تزايد
 ایله دی ؛ بالاخره عادتاً کونی کوننه یاشامق مجبوریتی حاصل
 اولدی ؛ هنوز برنجی متارکه ائناسنده بر قاج کونلک ارزاقک
 تدارک و آنبارلره ادخاری همان غیر ممکن بر حاله کلدی . ده
 صوکرآ آیلرجه معاش ویریله مدی . بدایت حربده بول بول ،
 مع ضم پاره لر صرف اولونورکن بالاخره اکثری مأمورینک
 قوت لایموتی اعطا اولونامادی . برکت ویرسون که مصرلی دین
 قارده شلر مژک کلیتی اعانه لری عسکره ارزاق تدارکی خصوصنده
 فوق العاده امداد ایتدی .

دارالحربده اهالی یدنده کی فضله ارزاقی مبیعه ویا تکالیف
 حربیه صورتیه آلمق بر فائده حربیه در؛ فقط ادرنه واشقودره
 قلعه لری مستثنا اولمق اوزره همان هیچ بر قطعه تکالیف حر-
 بیه [*] مراجعت ایتدی . بالاخره اک بویوک . مقاملردن

[*] وقت حربده کندی مملکت مزده اهالینک اردویه قارشی مجبو-
 ریتنه و تکالیف حربیه اجراسنه دائر صریح بر قانونک عدم موجودیتی
 شایان تأسفدر .

ویریلن صریح امرلره رغماً قطعات ینه بو اصول ایله ارزاق تدارک وادخارنده رخاوت کوستردی . حال بوکه سفر برلکک دها ایلك کونندن اعتباراً اهالی یدنده کی فضله ارزاق تکالیف حربیه صورتیه و فقط شدت و متانت لازمه ابراز ایدیلهرک جمع اولونسه یدی ، کرک قلعهلرک آنبارلری و کرک تجمع منطقه لرنده تأسیسی لازم کلن آنبارلر دولار و تجمع زمانی ایله حرکات حربیه نك ایلك دوری ایچون مرکزدن ارزاق سوقنه احتیاج قالمازدی . بزم طویلامادیغمز ارزاق ایله بالآخره دشمنلر مز آیلرجه عسکرلرینی بسله دیلر . . بالطبع شو قصور بالخاصه لوازم مأموریننک ، اداره ضابطاننک وقت حضرده بر مکتب مخصوصدن یتیشمه مش وقوماندانلرک مسئولیتی اوزرینه آلارک جسارت و متانتله ایش کورمهک آلیشماش اولمالرندن تولد ایتمشدر .

مملکتی تهدید ایدن تهلکه عظیمه لایقیله ادراک ایدیلدیکندن حربک قابل استفاده بوتون قوتله اجراسنه همان تشبث اولونمادی بالخاصه شرقی آناطولیده ، سوریه ده پک چوق قطعات یرلرنده ابقا اولوندی ؛ بالآخره فلاکتلر توالی ایتدکجه عقلمز باشمزه کلهرک قطعات مذکوریه جلیبه توسل ایتدکسه ده آرتق نتیجه حرب تعین ایتمشدی . حال بوکه عمومی سفر برلک امری دها ایلك کونندن اعتباراً بو قطعاته ده تشمیل ایدیلسه یدی ، هیچ اولمازسه برنجی چاتالجه محاربه سنده تعرضه کچه جک قوتمز اولور

ایدی . سفر برلکک بویله جسته جسته اجراسی قوتمزدن
لایقیله استفادهیه مانع اولدی .

ایشته سفر برلکده کی قصورلری قسماً تلخیص ایده بیلن
شو مسرودادن صوکرآ آرتق سزده بنمله برابر دیرسکنزکه ،
برسفر برلک ، اولسه اولسه ، آنجق بو قدر قاریشیق و فنا اوله بیلیردی .

تجمعه کی یا کلیشقلر [*]

بر حکومت بر قاج متفق دولت ایله حرب ایتدیکی زمان ، بویوک بر فائقیت عددیه قارشیسنده قالماد قجه ، خصملرینه نسبتله متفوق بروضعیتده بولونور ؛ چونکه کندیسنده وحدت اداره بولوندیغی حالده ، نقاط نظر اختلافی و جغرافیا وضعیتی دائماً متفقلرک بر کتله واحدہ کی اجرای حرکت ایتلرینه مانع اولور ؛ حال بوکه حربده سوق اداره تشتتی وقوای عسکریه نک داغیقلمی ، مشترکاً اجرای تاثیر ایده مه مسی قدر مضر هیچ بر شی یوقدر .

برنجی ناپولیونک موفقیات خارقه انکیزی ، کندی مها-رتیه برابر قارشیسنده کی متفقلرک مشترکاً اجرای تاثیر ایده - مه ملرندن متولد بولوندیغی شهہدن وارسته در . استاد مشارالیه ، متفقلرک عددی نہ قدر چوق اولورسه او قدر کندیسی ایچون فائده لی اولاجغنی دائماً سویلردی ؛ چونکه متفقلرک تعددی نسبتنده تشتت افکار حاصل اولاجغنی بدیهدر .

حکومت عثمانیه نک سفر بر ایده بیلہ جکی عسکرک مقدار یله

[*] کرک بوفصلده و کرک بوندن سوکرا کی فصللرده مندرج

تفصیلات ایچون عمومی بر بالقان خریطه سی کافیدر .

متفكر ك قواى مجموعەسى آراسنده بر نىسبەت نيزك موجود كىدى .
 حتى بعض حساباتە كوره عثمانى اردوسى عدداً متفوق ايدى .
 شو حالده وحدت اداره دن استفاده ايدەرك ايكنجى درجه اهميتى
 حائز اولان ير لره آز قوت افراز ايدە بيلير و اك مهم منطقه ده
 خصمندن پك فضله قوت جمع ايدەرك پك مؤثر بر ضربه قطعیه
 ايندیره بيليردى .

بالقان هيئت متفقه سنه قارشى حرېده ، حكومت عثمانيه
 ايچون اك مهم دشمن بولغارستان ايدى . بولغار اردوسى سائر
 متفكر ك هپسندن قوتلى ايدى ؛ همان صرب ، يونان و قره داغ
 اردولرينك مجموعنه مساوى قوتده ايدى . بوندن باشقه بولغار
 اردوسى حكومت عثمانيه قارشى اك بويوك تأثيرى ياپاييله جك
 بر جغرافيا وضعيتده بولونيور ايدى . بونك ايچون عثمانى
 اردوسى هم متفقين اردولرينه غلبه چالمق وهم حكومت عثمانيه نك
 اك زياده تهلكيه معروض جهتنى صيانت ايتك ايچون قوتنك
 قسم اعظمى ادرنه ولايتنده ، شرقى روم ايليده طويلامغه مجبور
 ايدى . حتى ، بولغارستانك سائر متفقرله بيرلكده سرعتله
 ماكدونىايى استيلا ايتك ايچون اردوسنك قسم اعظمى ماكدونىا
 جهتده طويلاماسى حالده دخى ، ينه عثمانى اردوسنك قسم
 اعظمى ادرنه ولايتنده طويلانمايدى . ماكدونىاده طويلاناجق
 اردونك اقسام اصلية وطنله ارتباطى سرعتله منقطع اولاييليردى .
 آطه لر دكزنده قطعى بر تفوق بحرى موجود دكلى . بونك

ایچون دشمن اردولر ، هر نه صورتا تجمیع ایدر لر سه ایتسونلر عثمانلی اردوسنک نتیجه قطعیه بی شرقده ، ادر نه طرفنده ، مریچ وادیسنده آراماسی لازمدی .

عثمانلی اردوسنک صورت تجمعی انتخاب ایچون بویوک بر سربستی موجوددی . سلامت عمومیه ایچون بر قسم وطنی موقه دشمن استیلاسنه معروض بیراقغه هیچ بر مانع یوق ایدی ؛ بوکا قرار ویره بیلیمک ایچون نه بر سیاسی دوشونجه ونه خصوصی بر اندیشه موجود دکلدی .

منحصراً فن حرب ملاحظاتی اجرای تأثیر ایده جکدی . متفقینه کانجه ، بالعکس بونلرک هر بری ، کندی مملکتی دشمن استیلاسندن مصون بیراقق وکندی خصوصی منفعت سیاسی سنی تأمین ایتک ایسته یه جکدی ؛ و بونک ایچون ملاحظات عسکریه ملاحظات سیاسی و خصوصییه فدا ایدیله جکدی .

حکومتلر آراسنده کی اختلافات ، دیپلوماتلر بیننده حل ایدیله میوب سلاحه مراجعت ایدیلنجه ، آرتق سیاسی ملاحظاتک تمامیه بیراقیلماسی . بوتون مساعینک آنجق اردونک غلبه سنه معطوف اولماسی و بونک ایچون ایجاب ایدن هر نوع فدا کارلقدن اجتناب ایدیله میسی قاعده قطعیه در ؛ فقط بوکا رغماً ، تاریخ حرب کوستریورکه ، اکثری قوماندانلر و حکومت آدملری بویک بسیط قاعدهیه بالفعل تبعیت ایدمه مشلر و تأثیرات سیاسی دن کندیلرینی قورتاراماشلردر . بدایه پک طساتلی

کورون ملاحظات سیاسیہ و بر قسم اراضی بی دشمن استیلاسنہ
معروض بیراقعہ راضی اولاماق فکری اکثریا حربک غائب
ایدیلسنی انتاج ایتمشدر .

مع التأسف بزم سوق الجیش تجمعزده عینی علتله معلولدر .
سفر بر لکده کی خطالر میاننده ذکر اولوندینی اوزره، اساساً
روم ایلییه سوقی ممکن اولان بالجمله قوتلرک تحشیدینه دقت
ایدیله مشدر . کرچه ، عراق ، حجاز ، یمن و طرابلس کبی
مواقع بعیدهده بولونان قوای عسکریه مزدن روم ایلیده واقع
اولاجق بر حرب ایچون استفاده مع التأسف ، قابل دکل ایدی .
دمیر یوللرک ، واپورلرک فقدانی بوکا جداً مانع ایدی ؛ فقط
شرقی آناتولیده و سوریدهده بولونان بالجمله قوتلری، بر آز کچ
اولقله برابر هر حالده روم ایلیده تجمع ایتدیرمک قابلدی ؛
حال بوکه روسیهیه قارشی بر قسم قوت افرازینه مجلوب اولمق . .
داخلی عصیاندن اندیشه ایتمک . . و اردونک ماهیت حقیقیه سنی،
مع التأسف سنلردن بری کولکشمش اولان جهالت و تنبلاکینی
نظر دقتله آمیهرق روم ایلیده تحشید ایدیله جک سائر قوتلری
بالقان دولترینه قارشی کافی بولمق کبی ملاحظات شرقی آناتولی
و سوریدهده کی قوای عسکریه مزدن تمامیله استفاده ایتمه مکه سوق
ایتمشدی .

بو ملاحظه لرنک کافه سنک اساسسنز اولدینی بدیهیدر :

۱ — روسیهیه قارشی ترک اولونان قوت، روسیه نك حربه

مداخله سی حالده، هیچ بر صورتله روس اردولرینی مملکتیزی استیلادن منع ایده مز. شو حالده از قوت بیر اقله هیچ بیر اقامق عینی نتیجه نی ویریر. یالکز حدودده قاچاقچیلغی منع ایتمک و حدودی ترصد ایتمک ایچون حدود قطعاتنک ابقاسی ولزوم کورولورسه بونلرک محلی مستحفظلرله تقویه سی کافیدر .

۲ — داخلی عصیان احتمالی نه قدر قوی اولورسه اولسون خارجی بر تهلیکه محققه، بر حرب موضوع بحث ایکن عصیانی تسکین ایچون اردونک بر قسمی حربه اشتراک ایتدیرمه مک دوغرو دکلدیر. ایجاب ایدن یرلرده محلی ژاندارمه لری، مستحفظلرله تقویه ایده رک آسایشی محافظه ایتمک لازمدر. بالخاصه شرقی آناتولیده بر عصیان ظهورنده، کافه سنک روم ایلییه کتیر یله سنه لزوم اولیان عشیرت آلایلرندن استفاده ممکندی.

۳ — اردومزك قیمت حربیه سی هر نه اولورسه اولسون امکان نسبتنده دشمنلرمزه عدداً فائق بر اردونک جمعی لزومی آشکاردر. بالخاصه تعرضی بر حرب اجراسنده نه قدر فائق بولونولورسه ینه قوتک کافی کلیه جگنی خاطر دن چیقارمامق حقنده تعلیمنامه صحیفه لرنده موجود اولان اخطارات بوبابده بر دلیل کافیدر .

هر حالده هیچ بر نظری حساب، حربدن اول موجود اولان هیچ بر ایستاتیسیق درت بالقان دولنک قوای مجموعه

حربیه سنی (۴۵۰,۰۰۰) دن اشاعی یه ایندیرمه یوردی . بوکا قارشى حکومت عثمانیه نك لا اقل (۶۰۰,۰۰۰) کیشی یی سفر بر ایتسی و بونك اك اشاعی ۴۰۰,۰۰۰ کیشی سنی شرقی روم ایلیده، ۱۵۰,۰۰۰ کیشی سنی ما کیدونیا و آرن اوودلقده متباقی ۵۰,۰۰۰ کیشی سنی آچیق حدود ، ساحل ، دمیر یول خطوطی و سائرہ ترصد و محافظه سنده و منزل خدماتنده قوللانماسی لازمدی .

حال بوکه عمومی سفر برلك او یله سفر بر ایدیلن قوتك اعظمی یكونی ، اك بول حسابہ کوره (۴۵۰,۰۰۰) نه آنجق یاقلاشوردی . نہایت اك نیکیین حسابہ کوره اعظمی (۳۵۰,۰۰۰) نی سفر برلكك یکرمنجی کونی یعنی دشمنلرمزله بر محاربه اجراسنه مجبور اولدیغمز زمان دارالحربده طوپلانا- بیلوردی . متباقی قسمك یاریسی سفر برلكك بشنجی هفته سنده واک صوڪ قسمی ده آنجق سفر برلكك یدنجی هفته سنده محارب اردویہ التحاق ایدہ بیله جکدی .

اردونك سفر برلك و تجمعه کى عظیم تشوشات و تأخراتی قوتی طوپلو بولون دورمغله بر درجه یه قدر تلافی ممکن ایکن ، بالعکس نه قدر داغیتمق ممکن ایسه او قدر داغیدیلدی . تجمع پلاننه کوره هیچ بر یرده (۱۲۰,۰۰۰) کیشیدن فضله طوپلو قوت کورمك قابل دکلدی : ادرنه ، اشقودره و یانیه قلعه لرینک محافظلرندن ماعدا ، سیار اردوی تشکیل ایدہ جک قوت ۱۶ قول اردویہ آریلش ایدی . بو ۱۶ قول اردودن یالکز شرقی

روم ایلی اردوسنک چکر دکنی تشکیل ایدن درت موظف قول اردو ایله ما کدونیاده طوپلانا و اوچ قول اردودن مرکب اولان واردار اردوسی اک بویوک، اک طوپلی قوتلر منی تشکیل ایدیوردی . بونلرک هرایکیسنک قوتی ؛ تقریباً یکدیگرینه مساوی اولمق اوزره ، یوزریک کیشیدن عبارت اولاجق ایدی ...

کرچه سفر بر ایدیلن وقسماً یکیدن تشکیل اولونان ۱۶ اردودن اونی ترا کیا جهتنه تخصیص اولونمش ایدی ؛ فقط بو اون قول اردودن آنجق دردی حربک بدایتده دشمن اردوسیله چارپیشایله جک ایدی . متباقی آلتی قول اردودن اون بشنجی و اون آلتنجی قول اردولرک ایلك میدان محاربه سنه اشتراک ایده بیلملری شهلی ایدی . دیگر درت قول اردونک ده سفر بر لکک اوتوزنجی کونندن اول دارالحربه مواصلتی غیر ممکن ایدی . اون بشنجی و اون آلتنجی قول اردولر غایت ضعیف اولدقلرندن هرایکیسنک مجموع قوتی آنجق بر موظف قول اردو مقدارنده ایدی . ما کدونیاده طوپلانا واردار اردوسی کرچه اوچ قول اردودن عبارت ایدی ؛ فقط بو قول اردولر ایکنجی صنف ردیف فرقه لر یله تقویه ایدیلش اولدیغندن واردار اردوسنک قوتی عددجه شرقی روم ایلی اردوسنک درت قول اردوسنه همان مساوی ایدی . شوحالده کرک ترا کیاده و کرک ما کدونیاده اولادشمن اردولریله چارپیشه جق قوتلر

یکدیگرینه مساوی ایدیلر ؛ یعنی متفقینک داغنیقلغنه مقابل بزم
 المزده موجود اولان وحدت اداره دن مع التأسف استفاده
 ایدیله مش ایدی .

هم بو حسابلر سفر برلكك شرائط اصلیه وطبیعیه داخلنده
 جریان ایتمسه کوره یاییلمش ایدی ؛ حال بوکه سفر برلك اعلان
 اولوندینی زمان ، اولجه ده تصریح اولوندینی اوزره ، حضری
 اردو قارمه قاریشیق بر حالده ایدی . بو قاریشیق شرق طرفده ،
 ترا کیده طویلانا جق قوت ایچون مهم بر ضعف وزیان تولید
 ایده جک ایدی . بو حالی نظر دفته آلاق ما کدونیاده طویلانا جق
 قوتی تنقیص و شرقی روم ایلی اردوسنی تقویه لازم ایکن بوده
 یاییلمادی .

اردو مزك روم ایلیده صورت تجمعی بر خریطه ده تدقیق
 اولنورسه بونک بر تجمعدن زیاده بر انقسام ، برداغیلمه اولدیغنه
 در عقب حکم اولونور . زرده دشمنک ایلروله مسی ممکن بروادی
 بر استقامت موجود ایسه همان طیقماق ایسته نیلمش و اورایه بر
 قوت افراز ایدلمشدر . حال بوکه ۱۶۰ سنه دن بری بویوک
 فره در یق طرفدن اثبات ایدیلش و خرج عالم اولمش بر قاعده
 بونک نه قدر مضر بر حرکت اولدیغنی سویلر کن بیلمم که بو آجی
 تجربه نی بر دها تکراره نه احتیاج وار ایدی ؛ فره در یق هر
 طرفدن متعدد دشمنلرک تعرضنه دوچار اولونجه «هر طرفی
 سترایتمک ایسته یین هیچ بر طرفی ستر ایده مز» دیمش و مملکتک

پك چوق طرفلرینی آچیق ، استیلايه معروض بیراقمدن
چکینمه یه رك تکمیل قوتيله بر دشمن اوزرینه یوکلہ نوب اونى
پریشان ایتمش وبعده دیکر لرینی تپه له مشدر . شو صورتله تمام
یدی سنه کوچوک اردوسیله کنديسنه برقاچ دفعه فائق اولان
دشمنلرینه قارشى مظفرانه حرب ایتمشدر .

کرچه یونان کبی کوچوک بر حکومت ایله منفرداً حرب
ایدرکن اونى هیچ بر زمان ، هیچ بر یردن وطنمزه تجاوز
ایتدیرمه مک لازمدر . فقط بو ، آنجق دشمنه قارشى بر فائیت
مطلقه تأمین اولونایلدیکی زمان قابلدیر؛ و بویله بر حالده ده قوت
ینه هر دارالحرکاته مساوی اولارق تقسیم ایدیلز؛ فرضا اپیر
و تسالیا کبی ایکی دارالحرکاتدن برنده یالکز دشمن تجاوزینی
دفع ایده جک قدر بر قوت بولوندورولور؛ دیکرنده ایسه دشمنی
ازوب قهر ایده جک درجه ده فائق قوت جمع ایدیلهرک تعرض
اجرا ایدیلیر؛ و کذا سفر بر ایدیلن اردو، آطه لر دکزندن
یونان دکزینه قدر تکمیل حدود بوینه قوردون واری دیزیلز؛
بر قاچ حیدودک ویا اوفاق بر قوتک حدودک هر هانکی بر
نقطه سندن تجاوزی احتماله قارشى اوراده قره غول تأسیس
ایدر کبی بر قوت مفلوج بیراقیلماز . اک مهم دارالحرکاتده قوه
اصلیه ایله یاییلاجق تعرض ، سائر جهتلرده واقع اوله جق اوفاق
تفک دشمن تجاوزلرینی درعقب توقیفه کافیدر .

ایشته شو قواعد صریحیه مخالف اولارق عثمانلی اردوسی

قارا دکزدن آدریاتیق دکزینسه ویونان مملکتنه قدر امتداد
ایدن تکمیلی روم ایلییه داغیلیمش ایدی :

- | | | |
|---|---|----------------------------|
| درد قول اردو | — | (قرق کلیسا - ادرنه) خطنده؛ |
| برضعیف قول اردو | — | ویزهده؛ |
| برضعیف قول اردو | — | دیمتوقه جوارنده؛ |
| بر قول اردو | — | مرادلیده؛ |
| اوچ قول اردو | — | چتالجه جوارنده؛ |
| بر قوتلی قول اردو | — | ادرنه قلعهسنده؛ |
| برضعیف قول اردو | — | قرجه علی حوالیسنده؛ |
| بر قول اردو | — | استروما وادیسنده؛ |
| قوتلی اوچ قول اردو | — | (اشتب - قومانووه) خطنده؛ |
| تقریباً بر قول اردو | } | پرشته جوارنده؛ |
| قوتنده فقط مفرزه
عنوانی حائر بر قوت | | |
| ایکی آایلق بر مفرزه | — | طاشلیجه جوارنده؛ |
| ایکی فرقه قوتنده و فقط
مفرزه عنوانی حائر
بر قوت | } | ایک جوارنده؛ |
| بر قول اردو | | |
| بر قول اردو | — | اشقودرده؛ |
| بر قول اردو | — | یانهده؛ |
| بر قول اردو | — | سرفیجه جوارنده قیالرده؛ |
| بر مفرزه | — | قره برونده. |

کورولیورکه آلدہ (قرق کلیسا - ادرنه) خطندہ طوپلانان
 درت قول اردو ایله (اشتب - قومانووه) خطندہ طوپلانان
 اوچ قول اردودن باشقه طوپلو قوت یوقدر. ایشته هر دورلو
 قیمت حربیه ملاحظاتندن وسفر برلك خطارندن صرف نظرله،
 یالکیز شو صورت تجمع بیله عثمانلی اردوستی ای حرکت
 ایدہ جک دشمن اردولری قارشینسندہ پریشان اتمک کافي ایدی؛
 تراکیا جهتندہ شمالدن (قرق کلیسا - ادرنه) خطنه دوغرو
 طوپلوچه ایبرله یه جک لا اقل (۲۰۰,۰۰۰) کیشیلک بر بولغار
 قوتی و ما کدونیاده کذا شمالدن (قومانووه) یه دوغرو متغارباً
 ایبرله یه جک (۱۵۰,۰۰۰) کیشیلک بر صرب ویا (صرب -
 بولغار) کتله سی هر حالده کرک شرقده و کرک غربده کی
 عثمانلی اردولرینی مغلوب و پریشان ایدہ بیلیردی . . .

« هر طرفی ستر اتمک ایسته یین هیچ بر طرفی ستر ایدہ مز »
 عجبا سنه لردن بری معلوم و محرب اولان . بوتون استاد حرب
 کچینمک ایسته یینلرک دائماً آغز لرنده دولاشان بو قاعده نهدن
 فعلیاته کلنجه تطبیق ایدیه مدی ! . . بز قوردون اصولندن ،
 کچن (عثمانلی - روس) حربنده ده پک چوق ضرر لر کورمشدک .
 بوکا رغماً عجبا نهدن متنبه اولما مشر ! . .

تجمعه ده کی خطاره دائر کرک سفر برلکدن اول و کرک
 سفر برلك ابتدا سنده سورت مناسبده بعض ایقاظه بولونمق
 ایسته یینلر خنده استخفاف ایله مقابله کوردیلر . شهه سز، بر

اردونك، بالخاصه هیئت ضابطانك وقت حضرده کی اشتغالاتیه وقت حربده کی وظائفی بیننده هیچ بر آهنگ و مناسبت موجود اولمازسه، فن حربه بیکانه قالنه جنی طبعی و بوقفه متعلق مسائل نازکی تدقیق و حل ایله مکلف اولان ارکان حربیه و قوماندا هیئتلرینک وقت حضرده مانوورده لر، ارکان حربیه سیاحتلری و جسم حرب او یونلریله اشتغال ایتدملری، سلامت مملکته تعلق ایدن بعض مسائل حربیه ایله نظری و عملی اوغرا شاملری، حتی قسماً خریطه او قومقدن عاجز و بر وضعیت حربیه یی ادراک و تدقیقه غیر مقتدر بولونمالری، بونلرک قوماندا ایده - جگاری اردویی، سوق و اداردن محروم، کلیشی کوزل حرکت ایدر، تصادفات لطفنه منتظر برنی آدم سسوروسی حالدن یوقاری به حیقارتاماز. هیچ شبهه یوقکه، ساده افرادک تعلیم و تربیه سی اردونک قیمت حربیه سنی یوکسه لته مز؛ بونلکه برابر هیئت ضابطانک بر قیمت مخصوصه حربیه به مالک اولماسی لازمدر. بوندن باشقه افرادمزك تعلیم و تربیه دن محرومیت محققسی ده ینه مشیردن ملازمه قدر تکمیل هیئت ضابطانک وقت حضرده کی قصورلرندن منبعث دگیدر؟ . . .

عموماً سفر بر ایدیلن قوتک تراکیا و ما کدونیا به طرز تقسیم یی یا کایش اولدیگی کی بونلرک هر بر دارالخرتده آیری آیری صورت تجمعلری ده که ملاً خطالی و موجب فلاکت ایدی.

بولغارلرک ۱۵ کونده سفر برک و تجمعلرینی اکمال

ایتدکلیری اوتهدن بری معلوم ایدی. حتی بعض حسابلره کوره بو مقدار اون ایکی یه تنزل ایدیوردی. کذا عثمانلی اردوسنک ده پک کچ، وسطی اوله رق ۴۵ کونده تجمعنی اکمال ایتدیکی مثبت و محرب ایدی. بو تأخر، مملکتک فوق العاده وسعتندن، سکنه نك آزلغندن، دمیر یوللرک ندرتندن، واپورلرک عدم کفایتندن ایلری کلیوردی. بو خصوصده عمومیتله معلول اولدیغمز لفاویدلکک، بروظیفه حصه مزه اصابت ایدنجه در عقب الکتریقنمش کی سریعاً حسن ایفاسنه غیرت ایتمه مملکتک ده تأثیری واردر.

شو حالده اردومزک تجمعنده و سفر پلاننده نظر دفته آله جق نقطه اساسیه، تجمعمزی اکمال ایچون وقت قازانمق و بونک اکالندن اول قطعی بر محاربه یه کیریشمه مکدن عبارتدی. بولغار اردوسی حدوددن بر کونلک مسافه کریده تجمع و سفر برلکک ۱۶ نجی کونی ایلری حرکت ایتدار ایتسه (قرق کلیسا - ادرنه) خطنده بولوناجق عثمانلی قطعاتیه سفر برلکک ۱۸ نجی کونی بر محاربه وقوعه کله جک ایدی. حال بو که بوزمانده (قرق کلیسا - ادرنه) خطنده طویلانا بیله جک عثمانلی قطعاتی - ادرنه قلعه سی محافظلری ده داخل حساب اولمق اوزره - اک نیکین حسابله اعظمی ۱۵۰,۰۰۰ کیشی یه بالغ اولاییوردی. بوقوتله لا اقل ۲۰۰,۰۰۰ محاربه - غیر محاربلری

ایله برابر ۲۵۰,۰۰۰ کیشی یه - بالغ اولان بولغار قطعاتیله [*]
 نتیجه قطعیه ویره جک بر میدان محاربه سنی قبول ایتمک، فلاکتی
 کندی المزله دعوت ایله مکدن باشقه برشی اولامازدی. کرچه
 اردونک صاغ جناحی قرق کلیسا وصول جناحی ادرنه موقعلرینه
 مستند ظن ایدیلیر سده حقیقت حالدده قرق کلیسانک هیچ بر
 قیمت تدافیه سی یوق ایدی. بوندن باشقه (قرق کلیسا - ادرنه)
 خطنده بولوناجق عثمانلی اردوسنک منزل خطی، خط رجعتی
 صاغ جناحی کریسنده مائلاً استانبوله دوغرو امتداد ایدیوردی.
 قرق کلیسانک شرقدن ایبرله یه جک بر دشمن قوتی اردونک
 خطر رجعتی پک قولایقله کسه بیلیردی. استانبول ایله مواصله سی
 کسین اردونک آج بیعلاج، مریح نهرینه دوکوله جکی ویا
 قسماً کلیولی شبه جزیره سنه طیقیا جنی محقق ایدی. هیچ

[*] بولغار اردوسنک هربری ۲۵,۰۰۰ محارب، ویا ۳۰,۰۰۰
 کیشی قوتنده کی ۹ فرقه سنندن سکزینی ترا کیا دارالحرکاتنه و برینی
 ردوب حدودینه تخصیص ایتدیکی و ما کدونیا ده منحصرأ صر بلرک
 اجرای حرکتیه مأمور اولدینی مفروضدره. حربدن اول بزم ایچون
 دشمنک حرکتیه دائر اک طبیعی فرضیه بو ایدی. بوندن باشقه
 متفقینک فن حرب ملاحظاتی منافع خصوصیه یه ترجیح ایده رک،
 نتیجه قطعیه یی سریعأ ترا کیاده استحصال ایتمک مقصدیله، حرب
 اردوسنک مهم بر قسمی ترا کیایه سوق ایتلمی ملحوظ ایدی. شو
 حالدده ترا کیاده تعرض ایده جک دشمن اردوسی ۳۰۰,۰۰۰ نه بالغ
 اولور ایدی. کرچه حقیقتده بولغار لر ما کدونیا ده بر فرقه تخصیص
 ایتلر سده اوکا مقابل صر بلرده ادرنه محاصره سنه یاردم ایتلر در.

شبهه یوق که (قرق کلیسا - ادرنه) خطی چتالجه خطیله مقایسه اولوناماز. چتالجه خطنک جناح لرینی طولاشمق قابل اولمادیغنی حالدہ (قرق کلیسا - ادرنه) خطنک صاع جناحی دائماً معروض تہلکہ در و خط رجعت دہ الکی زیادہ تہلکہ یہ معروض اولان بو جناحہ قریب بولونمقدہ در .

ہم (قرق کلیسا - ادرنه) خطی مدافعہ یہ صالح دہ دکلدر. حدود دن ارکنہ ایرماغنہ دوغرو اینن درہ لر مذکور خطی عموداً قطع ایدیورلر. اراضی شمالدن جنوبہ دوغرو آچالمقدہ در. بو حال، خریطہ لر دن آکلاشیلدیغنی کبی ارکان حربیہ عمومیہ جہ برسیاحت یاپیلہ ییدی، اراضی اوزرنده بالفعل تقدیر ایدیہ بیلیردی. ایشتہ مسرودات سالفہ یہ بناء، دکل اردونک موجودی ۱۵۰,۰۰۰ کیشی یہ، حتی ۲۰۰,۰۰۰ کمک ییہ نہ بالغ اولسہ بیلہ ینہ (قرق کلیسا - ادرنه) خطندہ طویلانمق دوغرو دکلدی.

بو خطدہ تجمع ایچون وقت حضرده یاپیلماسی لازم کلن استحضارات دہ پک ناقصدی . کرچہ (باندزمہ - صوما) و (قرق کلیسا - بابا اسکی) خطلری یاپیلمش ایسہ دہ (تکفور داغی - مرادلی) و یا ذہا دوغروسی (تکفور داغی - آلیا) خطی یاپیلماشدی ؛ (تکفور داغی) لیمانہ باشلانماشدی ؛ (میدیہ) دہ بر لیمان وجودہ کتیریلمہ مشدی ؛ (میدیہ - ویزہ قرق کلیسا) و (چرکس کوی - ویزہ) یوللری تنظیم و اصلاح اولونمشدی. قارا دکزده و مرمرہ دہ مناقلات سریعہ ایچون

کفایت درجه ده منتظم واپورلر تدارک اولونماشیدی . صوک
 زمانلرده آلنلر احتیاجه تقابل ایده جک مقدارده دکل ایدیلر .
 ایشته بوتون بونواقصی ، مدافعه مملکته صوک درجه تعلقندن
 دولایی عادتا اردویه طوب تفنک الموقدر اهم ایدی . بوخصو-
 صده کنديسنه واقع اولان اشعاراتی اهمال ایتدیکندن دولایی
 نافعہ نظارتی نه قدر بویوک فنالق ایتمش ایسه سلامت مملکته
 اجرای تأثیرایدن مواد مذکورہ نك بهمہ حال وسریعاً انشاسنده
 اصرار و « یابن ، یابو » دیمدیکندن دولایی جهت عسکریه ده
 قباحتیلدر . هر حالده بوتون بوایشلره ۱۳۲۵ سنه سنده ویا هیج
 اولمازسه (قرق کایسا) و (باندرمه) خطریله برابر باشلانمایدی .
 اوجوزه بهالییه باقمایارق حکومت بونلری برآن اول وجوده
 کتیرمه لیدی ؛ چونکه بونلر ، عادتا آچیق اولان سوقوق قاپو-
 سنه کلید یاپدیرمق نوعندن ایدی ...

(قرق کایسا - ادرنه) خطندن دوکرا ، (لوله بورغاز) جوا-
 ری و (قره آغاج) دره سی کریسنده کی خط کایر ؛ فقط بوخطک
 ده صاغ جناحی عینی صورتله معروض تهلسکدر . بوندن باشقه
 (قرق کایسا - ادرنه) خضندن آنجق برکونلک مسافه کریده در .
 دها شرقه کیدیلدیکجه دره لر ، دشمنک تعرض استقامتلیینه
 عمود بروضیت المقدمه اولدقلرندن مدافعه یه دها زیاده مساعد
 برحاله کلپورلر . بونلرک ایچنده بیاض کوی دره سی ، ارکنه
 ایرماغنک قسم علیاسی ، چورلو دره سی کوزه چارمقدمه در .

چورلو دره سی ایچنده دمیریول خطی بولوندیغندن بونک کریسنده
 طوپلانمق و دمیریولندن محاربه ائناسنده استفاده ایتمهک موا-
 فق دکلدر. اون کیلومتره قدر دها ایلریده بولونان ارکنه نه‌ری
 بو خصوصده دها مساعدر. شرق دمیریولی چرکس کویندن
 مرادلی‌یه قدر عادتاً ارکنه نه‌ری قسم علیاسنه موازی اولارق
 امتداد ایتدیکندن اردونک اکمال نواقصی ایچون غایت فائده لیدر.
 بیاض کوی دره‌سنه نظراً کرک استقامت جریانجه و کرک ارا-
 ضینک تشکلاتی نقطه نظرندن مدافعیه دها صالح بر حالده در.
 ارکنه کریسنده طوپلانیلدیغی تقدیرده (قرق کلیسا - ادرنه)
 خطنه نظراً کندی تجمعهز ایچون تقریباً اوچ کون قازانیلیر.
 تکفورداغی ، ارکلی و سیلوری‌یه چیقاجق قطعات همان بر
 کونک یوروشله تجمع منطقه‌سنه کلیرلر . استانبولدن اعتباراً
 دمیریولیه قطع اولوناجق مسافه‌ده یاریدن زیاده آزالیر .
 چرکس کوی ، چورلی و مرادلی کی اوچ استاسیونده اخراجات
 یاپیلا بیلیر. دشمنک هنوز تجاوز ایتدیکی مدت ظرفنده (میدیه -
 سرای) یولندن ده استفاده اولونا بیلور . بوکا مقابل دشمن ،
 لااقل اوچ کون دها غائب ایدر . شو حالده عثمانلی اردوسنک
 قازانجی آلتی کونه بالغ اولور ؛ سفر برلکک اون یدنجی کونی
 حدودی تجاوز ایدن دشمن اردوسی حدوددن اعتباراً ارکنه
 وادیسنه قدر وسطی اولارق ۱۲۰ کیلومتره قطعنه مجبوردر .
 بو مسافه‌بی اک مکمل بر اردو ، آلتی کوندن آشاغی بر زمانده

اصلا قطع ایده منز [*] عثمانلی اردوسنك ایلری قطعاتی طرفندن
 دوچار اوله جنی تأخری ده بوکام ضم ایتمک لازمدر . شو حالده
 ك ایرکن ، آنجق سفربریلکک ۲۲نجی کونی موضعه تقرب
 ایده جک و ۲۳نجی کونی طرفین اردولری آراسیده ایلک
 میدان محاربه سی باشلا یاجق . غولیچ باشا دخی ، بزم عقللی
 اوصلی ، اردومركز حالنه و ایجابات فیه موافق حرکت ایده جکمزلی
 ظن ایده رك ، بلغار سفربریلککک افرنجی بر تشرین اولده
 باشلامسنه کوره ، ۱۳ تشرین اولدن مقدم جبری بر محاربه
 وقوع بولامیه جغنی حربک بدایتده اعلان ایتمشدی ؛ فقط استاد
 محترم چراقلرینک بوقدر قوف اولدیغنی آکلایاماش اولمالی که
 بالآخره ارکنه خطنده تجمع ایدیلمدیکندن دولایی بزدن زیاده
 فریادلر قویاردی ، ایکه دی . بز ایسه ، زواللی وطن محبتک بو
 باده کی فریادلرینی بیله تاویله قالدق ...

ادرنه قلعه سنه ۳۵،۰۰۰ دن عبارت اولان قوه محافظه سی
 بیراقیلقدن سوکرا تکمیل شرقی روم ایلی اردوسی (سرای-
 مرادلی) خطناه تجمع ایتملیدی ، وارکنه لرینسده بر خط
 مدافعه تنظیم واحضار اولونمالیدی . قرق کلیسا خاصکوی
 جوارلرنده بولوناجق ایکی موظف پیاده فرقه سی ایله برسواری

[*] حقیقته بولغار اردوسی غایت متأنیانه و آغیر آغیر یورویه رك
 حدوددن (قرق کلیسا - ادرنه) خطنك شمالنده کی محاربه میداننه
 قدر اولان اونوز کیلومتره ك یولی درت کونده قطع ایتملردر .

فرقه سی تجمعی سزده، دشمنك ایلری یوروشنی برپارچه تاخیر
 مأمور اولمالیدرلر. و دشمن قوای فائقه سی قارشینده قطعی
 محاربه کیریشمه یهرك تدریجاً اردونك جناح لرینه چکیلملیدیلر.
 سفر برلکك ۲۳ نجی کونی ارکنه کیریشنده ک اردونك قوتی
 ادرنه محافظلرندن باشقه هر حالده (۱۵۰۰,۰۰۰) نه بالغ اولوردی.
 بولغار اردوسی بالعکس ادرنه قارشینده لاقول ۵۰,۰۰۰ کیشی
 ترك ایتدکن صوکر آتجق ۱۵۰,۰۰۰ کیشی ایله ارکنه قارشینده
 کلردی. کندی منزل خطی یانبولیدن اعتباراً ۲۰۰ کیلومتره یه
 قریب قیر یولنه منحصر اولدیغی حالده عثمانلی اردوسنك بری
 دمیریولی دیکری ارکلی اوزرندن دکنز یولی اولوق اوره ایکی سرب
 منزل خطی بولونوردی. کونلر حدجکه بولغار اردوسی ضعیفلر
 بالعکس عثمانلی اردوسی آناطولیدن دارالح به قوشان وطن
 یاورولریله تزیایدردی. بولغارلرک نومیدانه اجرا ایده جکلری
 تعرض چاتالجہ محاربه سنده اولدیغی کبی عده موفقیته منجر اولور
 وبر آرز صوکر عثمانلی اردوسی بونلری اوکنه قاتارق بالقانلر
 سورردی. بو حالده ادرنه، کن (عثمانلی - روس) حربنده
 آناطولی سفرنده قارص قلعه سنك غازی مختار پاشا اردوسنه
 تأمین ایتدیکی منفعتی بو دفعه شرق اردوسی ایچون حصوله
 کتیریر، یعنی عینی رولی اویناردی. کرچه ادرنه یه یقین
 بولونمغله میدان محاربه سی اثناسنده قلعه محافظلرندن استفاده
 اولونا بیاه جکدی. « فقط بوکا مقابل دشمن ده ادرنه یه قارشی

ترك ايده جيكي قوتدن عینی مقصدله استفاده ايده جكدی
 اكر وقت حضرده ادرنه و قرق كليساده برز قول اردو
 رينه برر مستقل فرقه تأسیس اولونسه يدی، و بو مستقل فرقه لر
 سفر برلنكده ادرنه و قرق كليسا موقعلری محافظلرينك اساسنی
 تشكيل ایتسه يدی، سفر برلنكده سیار اردويه منسوب قول
 اردو لر پارچه لایمزدی؛ و قرق كليسا محافظلری [*] سفر برلنك
 يلك كونندن اعتباراً قرق كليساده صحرا استحکاماتی و بلنكده
 قسماً موقته طرزنده تحکیمات یاپارق اوراده بر پلونه وجوده
 کتیرمه وهیچ اولمازسه قارشیدینده بر مقدار بوالغار قوتی
 طوتارق و یادشمن اردوسنی اون اون بشی کون ایچون او یالایارق
 نجمعمری ا کاله وقت قازانديره بیلیردی. بوندن باشقه سفر
 بلانك شو نقطه سی نظر اعتباره آلنه رق ده ا وقت حضرده
 جزئی مصرفله بعض حاضر لقلرده یاپيله بیلیردی . . .

شیمدی وقت حضره عائد ملاحظاتدن و سفر بر اولان
 قوتك هر ایکی دارالحرکاته صورت تقسیمنده کی قصورذن
 صرف نظره صرف شرق اردوسنك تجمی نظر تدقیقه
 آلیزسه کورولورکه، بو تجمعده خطالیدی؛ و هر حالده
 طولوجه ارکنه کریسنده تجمع لازمدی. هله ایتالیا حربی
 و داخلی عصیانلر و سائر حسیه اردونك سفر برلنك ابتداسنده کی

[*] مثلاً بابا اسکی ایکنجی صنف ردیف فرقه سی قرق كليسا یه
 تخصیص اولونور. و قرجه علی فرقه سی ادرنه یه کتیريله بیلیردی.

مشوشیتی و حال ضعیفی بو صورتله تجمه عادتاً اجبارایدیوردی .
 حتی دهامتائی ومدبر قوماندان اردونك شو حالنی نظر دقتاً
 آلاق ارکنه بی بیله قبول ایتمز و چاتالجه خطی کریسنده تجمعی
 اکیاله لزوم کوروردی .

کرچه بولغار اردونك قوه اصلیه سیله ما کدونیا ده تجمعی
 وروم ایلی شرقیده یالکنز بر قاچ فرقه ایله حال مدافعده
 قلاجنی ضعیف بر احتمال اولمق اوزره تأمل اولونا بیلیردی .
 بونی نظر دقتاً آلاق مملکتک بویوک بر قسمنی «دهاابتدای
 حربده آچیق بیراقمق غیر موافقدر و شاید «بولغارلر تراکیاده
 تعرض اصلینی یاپارلرسه اوزمان ارکنه «کریسنه چکیلمک
 مناسبدر «دینیه بیایر ؛ فقط بو او یونك نه قدر تهلکلی برشی
 اولدینی ، بویله بر زمانده کری چکیلمه نك معناً وماده ایقاع
 ایده جکی مضرات و تجمعک دوچار اولاجنی تشوش ایضاح
 محتاج دکلدرد .

شوسطرلری او قویان قاره ، بومطالعاتک بعدالحرب سویله ن
 بیسود سوزلردن عبارت اولدیغنی ظن ایدر ؛ فقط شونی ده
 سویله یه لم که ، سفر بر ایدیلن قوتک قسم اعظمنی تراکیاه تخصیص
 ایتمک و تجمعی ارکنه کریسنده اجرا ایله مک لزومی صورت
 مناسبده اسماع ایدیلک ایچون حربدن بر قاچ آی اول بعض
 تشبثات اجرا اولوندیغنی کبی سفر بر لکک اعلاقی متعاقب صورت
 تجمع بر درجه یه قدر آکلاشینجه ، باش قوماندانلق ارکان

حربیه سنه صورت رسمیه ده مکرر مراجعتلر واقع اولمش و بر قاج
 تقریر تقدیم ایدیلشدی؛ لکن مع التأسف هیچ بری مسموع اولمادی.
 غربی روم ایلیده، ما کدونیا و آرنا و ولقده کی جمعه کلنجه،
 عینی خطا اوراده ده موجوددر. بر کره اوستروما وادیسنده،
 پرشته، طاشلیجه، ایپک جوار لرنده قول اردولر، مفرزه لر [*]
 بولوندورارق اردویی داغیتمق، اولجده ده ذکر اولندیغی اوزره،
 سراپا خطادر. یالکز اوستروما وادیسنده کی (قره سنه) بوغازینی
 بر مستحفظ و یاردیف آلائی وایکی جبل طوپندن مرکب بر
 مفرزه ایله سدایتمک کافی ایدی؛ دیکر لری کافه بیلزوم ایدی.
 هله سلانیکک ستری والتصاق خطنک محافظه سی ایچون بر قول
 اردویی اوستروما وادیسنده کوتوروم ایتمک پک بی معناییدی.
 بر شهرک ستری فن حربیه توافق ایتمز؛ و حرب باشلانجه هر
 درلو ملاحظات سیاسیه توقف ایدر؛ یالکز فن حرب اجرای
 حکم ایدر. دمیریولنک محافظه سنه کلنجه، بونی بر بولغار چته سی
 امید ایدیله یین بر یرده قطع ایده بیلیر؛ نته کیم وقت صلحده
 بولغار اردوسی تجاوز ایتمدیکی حالدده چته لر طرفدن خط دفعاتله
 کسيلمشدی. شو حالدده بر قول اردویی معطل بیر اقمقده نه
 معنا واردی؟ ...

[*] مفرزه تعبیرینک بر فرقه دن ضعیف قطعانه اعطاسی اقتضا
 ایدرکن بعضاً بر قول اردو قوتنده کی قطعانک مفرزه نامیله توسیمی بزه
 مخصوص غرابتلردندر.

واردار اردو سنه كلنجه، بونك ده بولغار و صرب حدودلرنده
 آنجق ۴۰ : ۵۰ كيلومتره اوزاق اولان (اشتيب - قومانووه)
 خطنده تحشیدی ترا كیاده کی تجمع ایچون ذکر اولونان عینی
 اسبابدن دولایي یا کلیش ایدی. بالخاصه غربی روم ایلی اردوسی
 سوق الجیشجه حال مدافعه ده قالمغه مجبور ایدی. شو طالده بونك
 اك مهم ، اك بویوك قسمی اولان واردار اردوسنك کریسنده
 (واردار) کبی بر نهری بیراقارق (اشتيب - قومانووه)
 خطنده طوپلانمنسه هیچ لزوم یوق ایدی. سلانیك ایر کچ
 پای تخت ایله مواصله سی کیسه چکنه شبهه یوق ایدی. ذاتاً
 سفر پلاننده ده تصریح اولوندینی اوزره ، بو اردونك تدریجاً
 مناستر اوزرندن آرناوودلق داغلیرینه چکیله رك تمید مقاومت
 ایتمسی لازم ایدی. کرچه واردار نهرینك کریسنده تجمع
 ایدلیکی تقدیره واردار وادیسنده کی (سلانیك - اسکوب)
 خطندن استفاده اولوناماز ایدی؛ فقط دشمن تجاوزندن صو کرا،
 بو خطه اساساً او قدر احتیاج یوق ایدی. دهها سفر برلكك
 ایلك کونندن اعتباراً سلانیك، سیروز واسکوب حوالیسنده کی
 بالجمله فضله ارزاق ، مهمات اشیا ی میریه وسائر هان مناستره
 وسوق وادخار اولونمایدی. غرب اردوسی قرارگاهی سلانیكده
 دکل ، مناسترده تأسیس اولونمایدی ؛ و مناسترده صحراصولیه
 تحکیم ایدیش بر مستحکم اردوگاه وجوده کتیریله لی ایدی .
 هله اسکوب وقت حضرده بر درجه یه قدر تحکیم ایدیش

اولسهیدی ، اردونک انک زیاده معروض تهلهکه اولان سول جناحی ایچون نه آمین بر استناد نقطهسی وجوده کلش اولور ایدی .

سلانیکده آسایشک محافظهسی ، چتهلره قارشى مقاومت وقره برون استحکاماتی بر درجهیه قدر مدافعه ایچون قره برون مفرزه سیله ژاندارمه لر کافی ایدیلر .

دشمن چتهلرینک ویا کشف قوللرینک تخریباتندن وقایه ایچون ، مستحفظلرله ویا بعض ایکنجی صنف ردیف قطعاتیله بویدن بویه محافظه اولونان دمیر یول خطوطی ، دشمن اردوسی تعرض ایدنجهیه قدر ، سفر برلک و تجمع حرکاتی ایچون قوللانیله بیلیر ایدی ؛ بعده واردار نهری کریسنده طوپلانان واردار اردوسنک منزل خطی (کوپرلی - پرله - مناستر) طریقته انتقال ایدردی . اوسترومچه ، اشتیب و قومانووه جوارلرنده بولوناجق بررموظف فرقه واردوسواریسى تجمعی ستره و دشمن حرکاتی تأخیره مأمور اولورلر ایدی . قومانووه ده کی فرقه قاجانیک بوغازینی موقه سد ایچون بر پیاده آلایینه بر جبل باطاریهسی افراز ایدردی . بوتربیاتک حمایهسی آلتنده واردار اردوسی کوپرلی جوارنده و واردار کریسنده تجمع ایتمه لیدی ؛ وشو حالده غربی روم ایلی اردوسی قوماندانلی و واردار اردوسی قوماندانلی کی ایکی اردو قرازاکی تأسیسنه هیچ لزوم یوق ایدی .

وهلةً بو پلانك پك جسورانہ اولدینی و بولغار حدوندن
 سلانیکه قدر امتداد ایدن اراضی نك دشمن استیلاسنه معروض
 بیر اقلدینی سویله نه بیلیر ؛ کرچه بو اراضی آچقدر ؛ بر بولغار
 فرقه سی جمعه بالادن تعرض ایدرسه سهولتله ایلرله یوب سلانیکه
 ضبط ایده بیلیر ؛ فقط مقصد سلانیکه دشمنك کیرمه سی
 دکدر ؛ دشمن اردوسی مغلوب ایتمکدر . کو پرلی جوارنده
 دشمن اردوسی مغلوب ایده جک بر واردار اردوسی هر حالده
 سلانیکه کیره بولغار فرقه سی چابوق فراره مجبور ایدر ؛
 و یا خود واردار اردوسی آنجق دشمنك وارداری کچمسنه مانع
 اولورسه ، شو حالده هیچ اولمازسه بو نهرک غرنده کی اراضی
 دشمن استیلاسندن مصون قالیر . هر طرفی ستر ایده می دینه
 هیچ بر طرفی ستر ایده مز . بزعینی خطایی کچن (عثمانلی-روس)
 حربنده ده یا پمشدق : پلونه اطرافنده قطعی محاربات جزیان
 ایدرکن بوسنه وهرسکده ، صربستان و قره طاغ حدودلرنده
 یوزلرجه طایور عسکر داغنیق بر حالده ایدی هر طرفی ستر
 ایتمک علتندن تخلص کریبان ایدرک بو قوتلری همان طوپلایوب
 پلونه اوزرینه سوق ایتسه یدک ، عثمان پاشا قورتاریلیر . و روس
 اردوسی طونه یه دوکیله بیلیردی . بر کره روس اردوسی پریشان
 اولونجه صربستانه و قره داغه قارشی موجود اولان منازعات
 کندیلکنندن فصل اولونوردی .

بدایت حربده واردار وادیسنک و سلانیکک محافظه سی ایچون

هر طرفه قوت داغیدیلدیغندن و حدودك پك یقیننده تجمع ایدیلدیکندن
 دها اعلان حربدن بش کون سوکرا واردار اردوسی پریشان
 اولارق واردار وادسی کاملاً دشمن آنه کچدی: و کذا اعلان
 حربدن اوچ هفته سوکرا اوستروما قول اردوسی، همان جدی
 بر صورتده هیچ محاربه ایتمکسزین، حسن تحسین پاشا قطعاتیله
 برابر یونانلیلره تسلیم اولارق سلانیککی دشمن اشغال ایتدی.
 بوندن سوکرا واردار اردوسنک بقیه السیوفی ده مناسترده
 اوزون اوزادییه مقاومتیه مقتدر اولامیه رق تکمیل ما کدونیا
 و آرن اوودلغک قسم اعظمی دشمن استیلا ایتدی. ایشته بدایتده
 بر مقدار اراضی بی آچیق بیر اتمق جسارتی، متانتی کوستره مه مک
 بالآخره تکمیل روم ایلی بی آل قانلره بویامغه، خرابه زاره
 دوندرمکه سبب اولدی ...

سوق الجیش خطاری

بوتون بالقان دول متفقہ سی نامہ حرکت ایدن صوفیہ
 قابینہ سی ۳۰ ایلول ۱۳۲۸ تاریخندہ حکومت عثمانیہ ما کدوניה
 اصلاحاتہ دائر آغیر تکالیفی حاوی برنوطہ ویرمشدی. بونوطہ
 باب عالی یہ ایرتسی کونی کلدی . ۲ تشرین اولده مجلس وکلا
 بویله کستاخلرله مناسبات سیاسیہ ادامہ سنہ آرتق لزوم قلمادیغنه
 و بناء علیہ ارکان سفارتک همان بولونداقلری مملکتلی ترک
 ایتملینہ قرار ویردی؛ یالکز بونانہ قارشی بر آرماشا ایدہ رک
 اونی هیئت اتفایه دن آیرمغه چالیشیوردی. بناء علیہ ۳ تشرین
 اولده بولغار و صربلرله مناسبات قطع اولوندی . ذاتا قرہ داغ
 تجمعنی بیتریر بیترمز ۲۵ ایلول ۱۳۲۸ ده اعلان حرب ایتمشدی.
 حکومت ، سفر برلکک ایلك هفته سنده آوستریانک توصیه سی
 اوزرینہ ما کدونیاده بعض اساسلی اصلاحاتہ ، بوبابده موجود
 اسکی بر پروژہ یی احیا و تطبیقہ تشبث ایدہ رک بالقان اختلافک
 اوکنی آلمغه ویا هیچ اولمازسه وقت قازانمغه چالیشیوردی ؛
 فقط بالآخرہ تمدید مذاکرادن صرف نظرله ایلك نوطہ یی
 متعاقب مناسبات سیاسیہ یی قطعہ و مخصوصاتی کشاده قرار ویرمسی
 محتاج تدقیقدر. گرچه بر آووچ خلق باب عالی اوکنده نمایش
 یاپارق مذکور پروژہ نک تطبیقنه مخالفت و حربک بهمہ حال

اجراسی ایچون حکومت نزدنده اصرار ایتدی ؛ فقط احوال
 علمه وقوفی اولمایان بر قاج سوقاق چاقیننک ، حسیاتنه مغلوب
 وسلامت وطنی غیرمدرك بر قاج کنجک ، فدن ، اختصاصدن
 وثائقدن بی خبر برایی غزته جینک یاغره سیله مملکت بر تهله کیه
 سوق ایدلز ؛ حکومت بونوع یاغره لر قارشوسنده اظهار عجز
 ایچون مؤسس دکلدرد. اگر سلامت مملکت ایله خلقک اصرار
 ری معکوس و اصراره مخالفت ممکن دکلسه موقع اقتداردن
 چکیلک اولایدی. هر ناموسلو قاینه کندی قاعتی، مسلکی
 فکری و پروغرامی خلافتده بر حرکته محبوریت کورونجه
 در عقب استغفا ایدر. ۱۳۲۹ سنه سنده متفکر آراسنده اراضی
 مفتوحه تقسیمندن منبعث اختلافات بر حربه تحویلی ایچون
 بولغارستانده بعض جریانلر ظهور ایدنجه ، بونی سلامت مملکت
 ایله قابل توفیق کورمه ین (کاشوف) قاینه سنک استغفاسی بوکا
 اکیکی و مکملی بر دلیلدر. نته کیم وقایع جاریه کاشوفک نه قدر
 حقلی اولدیغنی اثبات ایتشدرد.

بالقان حربی وقتندن اول کشاد ایدن قاینه نک بو خطاسی،
 بر خطای سیاسی اولمغله برابر، جهت عسکریه نک سوق الجیشجه
 بویوک بر قصورینک بوکا سبب اولدیغنی ظن ایدیورز ؛ قرارگاه
 عمومیده هر کون نه قدر عسکرک ترا کیاده طوپلان دیغنی مشعر
 بر جدول تنظیم و باش قوماندانه تقدیم اولونوردی. تشرین اولک
 ایلک کونلرنده بوجدوللر ، شرقی روم ایلیده، ترا کیاده بولونان

قوتك ادرنه محافظلریله برابر تقریباً ۱۵۰,۰۰۰ کیشی یه بالغ اولدیغنی اراهه ایدیورلردی. قرارگاه عمومینک حرکات عسکریه ایله توغل ایدن ارکان مهمه سی باش قوماندان ایله برلکده برقاچ دفعه باب عالی یه کیده رك مجلس وکلاده وضعت حربیه یه دائر ایضاحات و مطالعات ذاتیه لرینی درمیان ایتشلردی. بر آراق مملکتده موجود بعض ارکان عسکریه ده بو مذاکراته اشتراك ایتشدیلر. ایشته بو مذاکرات و ایضاحاتدن سوکرا باب عالینک تبدیل فکر ایده رك همان مخاصماته ابتداده قرار ویرمش اولدیغنی ملحوظدر.

هرنه اولورسه اولسون حکومتک، حربیه نظارتنک، وافتنی استحصالیته دن حربیه مباشرت ایتدیگی محققدر. بولغاری نوطه سی، پک آغیر تکالیفی حاوی اولمقله برابر، ایتالیا نلرک بر سنه اول ویردکلری نوطه کبی ۲۴ ساعت ظرفنده حربک ظهورینه سبب اولاجق بر اولتیماتوم ماهیتنده دکلدی. حکومت حربدن اجتناب ایتهمکله برابر سیاسی مذاکراتله مخاصماته بدأ زمانتی بر مدت تأخیر ایده بیلیر شو صورتله اردونک هنوز بیتمین ویتمه سی پک اوزاق اولان تجمعی بر درجه یه قدر اکمال ایچون وقت قازانا بیلیردی. بولغارلر هنوز کندی سفر بر- لیکلرینک ۱۳ نجی کونی: یعنی تجمعلرینی ده ایتیرمه دن نوطه ویرمشلردی؛ شو صورتله بر قاچ کونک مذاکراتله کچه جکنی تخمین ایتشلردی، فقط بز، کویا همان حدودی کچمکه حاضر-

مشترکې ، ایلک نوطه اوزرینه در عقب مناسبات سیاسیه یی قطع ایتدک ؛ بو نوطه نك رسماً تبلیغی متعاقب ، ۳ تشرین اول کیجه سی باش قوماندانلق تلغرافله :

« بولغارستان و صربستان ایله مناسبات سیاسیه منقطع اولدیغندن بتوفیقه تعالی حرکات عمومیّه تعرضیه به ابتدار اولونماسنی »

شرق و غرب اردولری قوماندانلرینه امر ایتدی ؛ هر حالده بو امر ، باش قوماندانلق ارکان حربیه سنک معلوماتی اولمادن ، بالذات باش قوماندان طرفندن یازیلماش ایدی ؛ قرار کاهلرده اوتهدن بری مرعی اصوله توفیقاً ، علی مراتبهم تحریر و امضا ایدیلشدی . ایشته شو تفصیلات کوسترییور که حکومت هر حالده قرارگاه عمومینک ، بویابده سوز سویله مکه صلاحیتدار اولانلرک موافقتی ، بلکه ده اصراری اوزرینه مناسبات سیاسیه یی قطع و خاصاتی کشاده قرار ویرمشدر . حال بوکه عثمانلی اردوسی بو ائشاده قطعاً تجمعنی بیتیرمه مشدی ؛ طویلانان قطعات ده یرلرندن قیلدایاجق بر حالده دکل ایدیلر . قول اردولرک نقلیه قطارلری ، جبخانه قوللری تمامیه تشکل ایتمه مش و منزل منطقه سنده ارزاق آنبارلری و جبخانه ده پولری وجوده کتیریله مشدی ؛ دمیریولی نقلیاتی قارمه قاریشیق اولمشدی . اردو بو حالده ایکن کندی ائزله مخصوصاته بدأ زماننی تعجیل ایتک نه بویوک فنالقدی ... اوت ، تجمعک صورت جریاتی مشعر جدوللر تراکیاده ۱۵۰,۰۰۰ کیشینک بولندیغنی کوستر-

یورلردی ؛ فقط بو مقدار بوتون اکمک ییهن موجوددن عبارت ایدی . بونک مهمجه بر قسمنی غیر محاربلر تشکیل ایدیوردی . بوندن باشقه مذکور قوت بر معین منطقهده مجتمع دکل ، بالعکس استانبولدن ادرنهیه ، تکفور داغندن قرق کلیسایه قدر امتداد ایدن ساحه وسیعهده داغینیق برحاله ایدی . عجیبا بو حاله بولنان بر اردویه حربه حاضر می دینیر ؟ سنه لردن بری بزمه حرب ایچون حاضر لانان ، حربی آنجق سرعت حرکت سایه سنده قازاناغنی بیلدیکی ایچون اردوسنک سفر برک و تجمعی لسریع ایده جک هر دورلو وساطی احضار ایدن بولغارستان بیله ، بو بزم پک عجمیجه حرکتمز قارشیسنده متحیر قالمشدی ؛ ۳۰ تشرین اولده رسماً انقطاع مناسبات خبرینی بولغار سفیرینه تبلیغ واردولرمزه شرقدن ، غریدن همان حرکات تعرضیه ، ابتدار ایتمه لرینی امر ایتدی کمز حاله تمام ۴۸ ساعت بولغارلرده هیچ بر حرکت کورولمهدی . چونکه بزدن پک چوق اول سفر بر اولان و تجمعی ایدن بولغار اردوسی بیله هنوز حرکات حربیه به بدأ ایده جک برحاله کله مشدی . آنجق فردیناند بش تشرین اولده اعلان حرب ایتدی ؛ و اوکون آقشامی بعض اوافق تفک بولغار مفرزه لری حدود جوارنده بوش بولدقلری کویلیری اشغال ایتدی لر : اصل حرکات حربیه به ۶ تشرین اولده ابتدار اولوندی . مناسبات سیاسی به سربعاً قطع ایتدی ر مکده کوستریلن

خطا يتشمه يورمش كې بونك آرقه سندن هان شرق و غرب
اردولرينه تعرض امرى ويرمك، آرتق تعبير معذور كورولسون،
بر اثر جنت اولسه كر كدر. بونى هيچ بر صورتله منطقه توافق
ايتديرمك قابل دكلدر.

پياده تعليمنامه سى ۳۷۱ نجى ماده سنده ديور كه :

« تعرض ايچون نه قدر قوتلى بولونولورسه ينه كافى عداولوناماسى
نقطه نظرى « قوتلك تعين و حسابنده اساس اتخاذايديله ليدر . »
بو قاعده تعيه ايچون نه قدر دوغرو ايسه سوق الجيش
ايچونده عين قيمت و اهميتى حائزدر . سوق الجيش ايچون اك
مهم قاعده ، محاربه ايدىلىسى مأمول اولان محله دشمنه نسبتله
يك فائق قوتلر طوللامق و وقوع بولاجق ميدان محاربه سنده
دشمنى ازوب پريشان ايدرك بردها مقاومتته غير ممكن برحاله
كتيرمكدر . ايسته بو اردو قوماندانى حرکات جسيمه حربه
اثاسندد بوتون مساعيسنى بو نقطه يه توجه ايدر ؛ دشمنى
غير مساعد شرائط تحتنده ياقالامق و پريشان ايتمك ايستر .

اك زياده تقليدينه ييلته نيلهن (مولت كه) بيله (آلمان-فرانسز)
حربنك ابتداسنده (زار) كريسنده ويريله جكنى تخمين ايتديكى
ميدان محاربه سنه اوچ آلمان اردوسنك اشتراكنى تأمينه چاليشه رق
ايلك ميدان محاربه سنده فرانسز لرى برباد و محوايتمك ايسته يوردى ؛
بو تصورى خلافته ، برنجى آلمان اردوسى قومانداننك
استعجالى يوزندن، (شپه رن) محاربه سى وقوع بولديغى زمان

— نتیجده آلمانلرک غالب کلملرینه رغماً — پک زیاده جانی
صیقلمش ایدی .

بالخاصه بر حربک ایلك میدان محاربهسی بویوک بر اهمیتی
حائزدر : بو محاربهده غالب کلن طرفک قوهٔ مغنویهسی صوک
درجهده تزايد ومغلوبک کی بالعکس فنا حالده تناقص ایدر .
بو کونکی وسائط حربیه نه قدر تکمل ایدرسه ایتسون ، ینه
محاربهلری اداره واجرا ایدن قوت بشردر . بو قوت ایسه
مادیاتدن زیاده مغنویاته مربوطدر . زمانمزده حربلر پک سیرک
اولدیغندن اردولری وجوده کتیره ن انسانلرک اکثریسی تجارب
حربیه دن محرومدر ؛ بناءً علیه ایلك میدان محاربهسنده هرکس
کندینی تجربه ایتک ، محاربه نك نه چشید شی اولدیغنی او کر نمک
ایستر . اکر بو محاربه مغلوبیته منجر اولورسه آرتق اردو
افرادینک اکثریسی متانت وجرأتی غائب ایدر و حربک نهایته
قدر بو مغلوبیتک تأثیر مدهش ولرزه ناکی آلتنده زبون قالیر .
ایسته شیمدی یه قدر اجرا اولونان حربلرده ایلك مغلوب اولانک
اکثریتله تکمیل حربی غائب ایتسی آنجق بو تأثیردن متولددر ؛
بناءً علیه ایلك میدان محاربهسنک غایت مدبرانه احضار ایدیلمسی
بر قاعدهٔ حربیه در .

حال بوکه ، اولجهده دفعاتله ذکر اولوندیغنی اوزره ، ۳۳ تشرین
اولده بزم نه سفر بر لکمز ونه تجمعمز بیتمه مشدی . کرچه

دردت موظف قون اردو (قرق کلیسا اوزون کوپری) [*]
 خطنده مجتمع کوزو کیوردی ؛ فقط خفیف حالده بو قول
 اردولرک یالکیز بررقسمی مذکور خطده بولونیوردی ؛ اقسام
 مهمه سی چورلی وتکفور داغنه قدر داغنیق ایدی ؛ بوندن
 باشقه هنوز سفر برلکاری لایقیله اکمال اولوناماشدی هله
 تعرض ایچون لازمکلن کری خدماتی وجیخانه قه لاری ، نقلیه
 قطارلری اصلا تنظیم واکمال ایدیه مه مشدی . ما کدونیا جهتنده ده
 (واردار) اردوسنک آنجق بشنجی ویدنجی قول اردولری اشتیب
 وقومانووہ جوارلرینه گلش ایدیلر ؛ آلتنجی قول اردو هنوز
 مناسرتدن حرکت ایتمشدی . بو حالده بولنان قطعات تعرض
 دکل ، مدافعه یه بیله مقتدر دکل ایدیلر ؛ بنساءً علیه ویریلن
 تعرض امرینی کیم ایفا ایدہ جکدی ؟

تعرض امری ، آنجق ، هر دورلو حاضر لغی ، سفر برلک
 وتجمعی تماماً بتیرمش ویالکیز حکومتک سربستی حرکات
 ویرمسنه انتظار ایدن براردو ایچون ویریلر . کرک ترا کیاده کی
 دردت موظف قول اردونک وکرک ما کدونیا ده کی واردار
 اردوسنک تجمعلرینی بتیردکارینی فرض ایتسه ک بیله ، بونلرک
 شرقده ۲۰۰,۰۰۰ وغربده ۱۵۰,۰۰۰ کیشیلک دشمن اردولرینه
 تصادفلری اغلب احتمالات ایدی . حال بوکه (قرق کلیسا - ادرنه)

[*] دردنجی قول اردو تشرین اول ابتدا سنده اوزون کوپری
 شمالنه کتیریلشدی .

خطنده کی قوت ادرنه محافظلری ده داخل اولمق اوزره اعظمی
 ۱۵۰,۰۰۰ و واردار اردوسی البول حسابله یوزیک کیشی به
 بالغ اولاجقدی . بو قوتلرله کندیلرینک ۱,۵ مثلی فائق دشمن
 قطعانه تعرضه هیچ بر امید موفقیت اولا بیلیرمی ایدی ؟ ..
 قوماندانلق ، انسانلری قصابخانیه سوق ایتک دکدر .
 قوماندانلق هر دورلو احتمالات موفقیتی تأمین ایدرهک اردویی
 مظفر قیلمق و قدر مملکتی اعلا ایتکدر . عجباً بو قدر آرز
 قوتله ۱,۵ مثلی فائق دشمن قطعانه تعرض ایتکی مصیب
 کورنلر ، آرز قوتله متفوق دشمن اردولرینه غلبه چالان
 قوماندانلری می تقلید ایتک ایسته یورلردی ؛ فقط شیمدی به
 قدر موجود هیچ بر قاعده حریبه تفوق عددی استحصالی
 ممکن ایکن بوندن صرف نظر ایله مکی توصیه ایتهمشدر .
 مذکور تعرض امرینی تأییداً بر قاچ کون صوکر ا ویریلن
 دیگر بر امرده شرق اردوسنک ادرنه محافظلر نندن بر سیار
 قول اردو تشکیل ایدرهک ادرنه اوزرندن (طرنوه = سیملی)
 استقامتنده تعرض ایتکی تبلیغ اولونیوردی . دشمن اردوسی
 (یانبولی - طرنوه) خطنده تجمع ایدرکن مریج وادیسی
 استقامت عمومیه سنده ایله مک اونک صاغ جناحنی وورمق
 ایسته نیلدیکنه دلالت ایدر . عجباً بو صورتله ناپولون اصول
 حربنک اوصاف میزه سندن عبارت بولونان وقونت (شیلفن) ک
 یک زیاده مظهر رغبتی اولان مائل ویا ترس جهلهلی محاربه لر می

تقلید ایدیلک آرزو اولونیوردی. کرچه مشارالیه (قانه) نامنده کی
 [*] کتابنده مذکور اصولی پک بویوک بر حرارتله توصیه
 ایتمش ایسهده تأمینی امکان داخلنده اولان تفوق عددیدن واز
 کچمکی خاطرینه بیله کتیرمه مشدر. اونک اساس نظریه سنک
 (Vernichtungsschlacht ملحمه کبرا) اولدیغنی اونوتمامالیدر؛
 یعنی مثلاً، سلطان مراد خداوندکارک اجرا ایتدیکی قوصوه
 ملحمه کبراسی کبی شدتلی بر میدان محاربه سیله حربی دفعه
 و قطعاً قازانمق دشمنی محو ایتمکدر. یالکز مائل ویاترس جبهه
 ایله محاربهده بومقصددها قولای استحصال اولونا بیله جکندن
 بونوع محاربه لر قونت (شلیفن) طرفندن ترجیح اولونمقدهدر.
 مشارالیه بر سنهدها یاشاسهیدی، عثمانلی اردوسنه ویریلن
 تعرض امرینی هر حالده (قانه) نک صوک فصلنه زمین اتخاذا
 ایدر. وبونی نه صورتله تلقی ایتدیکی کندی لسانندن
 دیکله نیردی . . .

کرچه واسع برچویرمه حرکتی اجرا ایدن دشمن اردوسنک
 بر جناحنه طویلوجه، کتله حالنده تعرض ایدیلیرسه، عکسی
 طرفده کی دشمن قوللرینک یاردیمنه امکان بیراقه دن، دشمنی
 پریشان ایتمک قابل وپک شایان تقدیر بر مانووردهدر. بولغار
 قوای اصلیه سنک (یانبولی) جوارنده بولندیغنی وبولغار باش

[*] مذکور اثر قسماً ارکان حربیه قائمقامی جمیل بک طرفندن

۱۳۲۸ سنه سی ابتدا سنده لسانمزه ترجمه ونشر اولونمشدر.

قوماندانك اورادن (قرق کلیسا) استقامتنده ایله یه ركه عثمانلی اردوسنك صاغ جناحنی چویرمك ایسته دیکنی مشعر دوران ایدن شایعات وافکار بویله بر تعرضه سوق ایتمش اولابیلیر : سریعاً (طرنووه - سیمنلی) استقامتنده ایله یه ركه بولغارلرک صاغ جناحنه تعرض ایتمک واونلری قارا دکزه آتمق برمانووره در؛ فقط خریطه اوزرنده پیونلر قوللانیدینی زمان بلا تأمل تطبیق اولونور . بویله بر حرکتی ساحه حقیقتده اجرا ایچون صاحب عزم و متانت قوماندانلر ، وظائف حربیه نی ادراک و ایفایه مقتدر هیئت ضابطان و مانووره قابیلیتی فوق العاده قطعات لازمدر . بوندن باشقه حرکات حربیه منطقه سنکده یوللری کثیر و حرکات سریعه اجرا سنه مانع اولمایاجق طبیعت و ماهیتده بولونماسی اقتضا ایدر . حال بوکه ، هر دورلو قیمت حربیه و مانووره قابیلیته متعلق ملاحظاتدن صرف نظرله هنوز منتظمأ ایلری حرکتیه ابتدار ایدر جک درجه ده حاضر لانماش اولان عثمانلی اردوسندن بویله برمانووره طلب ایتمک ، بر آنطولی کویلوسنی ، دفعه چاقشیرینی چیقاروب فراق کیدیردک صالونه کوتورمک و هایدی رقص ایت دیمکدن باشقه برشی دکلدر ...

عجیباً بو تعرضدن مقصد ، فرانسه لرک ۱۸۷۰ سنه سنده یایمق ایستدکاری فقط یاپامادقلری سوق الجیش باصقیننی تقلیدمی ایدی ؟ .. فقط بوکاده امکان یوقدی : زیرا دشمنلر مزك هر حالده بزدن اول سفر برلك و تجمع لرینی اکمال ایتدکلرینه شبهه یوق

ایدی ؛ بزم سفربرک و تجمعده کی بطاقتز مشهور جهان
ایدی ؛ دشمنک سفربرک و تجسعی اخلاص ایچون الیه کافی
قوت یوق ایدی ؛ و بزم تعرض امری ویردیکمز زمان هر حاله
دشمنلر من تجمعلرینک صوگ کونلرنده ایدیلر . اکر ایتالیا
حربی وسیله سیله از میر و چاناق قلعه ده طوپلانان قطعات و موظف
اردوده کی افراد مستبدله ترخیص ایدیله مش بولونسه ایدی
و قطعات مذکورده نك سفربرلک لکری تمامیه اکمال و سلاح آلتنده
بولونقلری مدتجه تعلیم و تربیه لرینه جدأ اهتمام ایدیش اولسه ایدی
الیه نهایت بر هفته ده (ادرنه) جوارینه طوپلانماسی ممکن
۱۰۰,۰۰۰ کیشیلک بر قوت بولونمش اولوردی . اوچنجی
و دردیجی قول اردولرده بر هفته ده سفربر اولارق بو قطعاته
التحاق ایده بیلیرلردی ؛ شو صورتله ۱۵۰,۰۰۰ کیشی ایله
روم ایلی شرقیه تجاوز ایدرک دشمنک تجمعی اخلاص و دشمن
مملکتی محو و تخریب اولونا بیلیردی ؛ فقط نه اهلیمز بویله بر
سرعته آلیشمش ، نه ده اردومز بویله بر حرکتی اجرایه
مساعد قابلیت حرکت و قیمت حربیه اکتساب ایتمش ایدی .
بو نوع حرکتی بولغارلرک بزه قارشى یایمالری ممکن و موفقیت
قازانملری پک محتمل اولدینی حاله اونلر بیله او جسارتی
کوسترمه مشلردر . حربدن بر آزا اول شمنی جوارنده قلعه
مانوورهلری بهانه سیله رادقو دیمتری یه فک اردوسی تجمع ایتمش
و قرق کلیساده موقع مستحکم بولاجقلرینی ظن ایدرک بورایه

یا باجقلری هجومی تعلیم ایله مش ایدی . سفر برک اعلان اولوندیغی زمان بوار دو ، بر ایکی کون ایچنده نواقصنی ا کمال ایدرک همان حرکتیه بدأ ایدر بیله جک درجه ده حاضر دی ایشته ائنده بویله بر قوت وار ایکن بولغار اردوسی ینه بر سوق الجیش باصقینی یا بمق جرأتی اظهار ایدر مدی . بویله ایکن عجباً بز هانکی امکانه ، هانکی قدرته بنای آمال ایدیوردق ؟ .. تعرضک تأثیر سحارینه می محبوب اولدق . یوقسه طرابلسده کی محاربه لر می بز ی بو جرأته سوق ایتدی ؟ .. فقط اوراده کی شرائطک بوس بوتون باشقه اولدیغی ، اوراده بر مستملکه حربنک جریان ایتدیکی ، سریع حرکات جسمه حربیه اجراسی اساساً نظر دقتیه بیلر آلمادیغی هیچ دوشونولمه دیمی ؟ ..

حاصلی هانکی نقطه دن تدقیق ایدیلسه ، تعرضی موافق بولمق ممکن دکدر ...

قرق کلیسا مغلوبیتندن سوکرا اردونک طوپلانماسی ایچون (پیکار حصار - لوله بورغاز) خطی انتخاب اولونمشدی . بوخط ، مقاومت ایچون هیچ بر وجهله مساعد دکل ایدی ؛ بوندن باشقه ایلك محاربه میداننه پک یقین اولدیغندن قطعاتک بوراده اعاده انتظامه وقت بولمادن دشمنک تعرضه دوچار اولمالری محتمل ایدی . اکر قرق کلیسا میدان محاربه سی ، نتیجه نک موفقیتله تتوج اتمه یه جکی آ کلاشیلار ق محاربه نی قطع ایتک نوعندن ختامه ایردیر یلسه یدی ومنتظاماً رجعت اولونسه یدی ، ایلك محاربه

میداننک اون بش یکر می کیلومتره کریسنده مدافعه یه دهاز یاده صالح بر خطه چکیلیمک اصولاً موافق اولور ایدی . بوراده نه محاربه بو صورتله قطع اولونمشدی . ونه (پیکار حصار-لوله برغوس) خطی مقاومتیه مساعد ایدی . کرچه شرق اردوسی قوماندانلی بو خطی ، قطعاتک طوپلانماری وبر آز کندیلرینه چکی دوزدن ویرملری ایچون تعیین ایتمشدی . بالآ خره ارکنه کریسنه چکیلیمک ایستدیکنی کرک مذکور نهرک کریسنده کی اراضی بی کشف ایتدیرمه سیله ، کرک اردو قرارگاهنک دوغرو صولوغی چورلیده آلماسیله وکرک مذکور نهر کریسنه چکیلیمک ایچون بالآ خره ویردیکی امر لرله مثبتدر ؛ فقط هر نه اولورسه اولسون (پیکار حصار - لوله برغوس) خطنده بر کون توقف بیله ، هیچ آرزو ایدیله ین زمان ومحلده بر محاربه بی انتاج ایده بیلیر . ای ییتیشمش بر خصم اردوسی ، نهایت بر کونلک استراحتی متعاقب ، ۱۲ تشرین اولده تمقیبه ابتدار و آقشام اوزری پیکار حصار جوارینه مواصلت ایده رک شرق اردوسنک بو خطدن بلا محاربه چکیلیمسنی غیر ممکن قیلا بیلیردی . کرچه بولغار اردوسی بودرجه سرعت کو ستره مدی ؛ فقط بز وضعیتی تدقیق ومحا که ایدرکن خصمک الزامی وبزه اک مضر صورتده حرکت ایده چکنی تأمل ایتمه که مجبورز . نته کیم دشمنک اوچ کون سوکرا ، ۱۵ تشرین اول آقشامی بو خطک قارشینسه کلیمسنه رغماً بعض مؤثرات اردونک ارکنه یه چکیلیمسنه مانع

اولش ونهایت (لوله بورغاز) میدان محاربه سی ظهوره کلمشدر .
 اکر قرق کلیسا یورغونلغنی متعاقب شرق اردوسنه دوغرو
 ارکنه کریسنه چکیلوب اوراده طوپلانماسی امر وبوخصوصده
 قول اردولره یوروش استقامتلی وهرکون واصل اولاجقلری
 هدفلر اعطا اولونسه یدی، هم بوخط مدافعه نیک تنظیمی ایچون
 وقت بولونور، هم اردونک جیخانه وارزاقجه نواقصی، دمیر
 یول خطنک وضعیت مساعده سندن دولایی، دها سهولتله کال
 اولونوردی. وهم لوله بورغاز خطنده قلمنی انتاج ایدن حادثات
 ظهور ایتمزدی . بوندن باشقه ارکلی و تکفور داغنه چیقان
 قطعات دها آز زمانده اردویه التحاق ایده بیلیرلردی.

استانبولده بولونان قرارگاه عمومی قرق کلیسا میدان
 محاربه سنک امیددی خلافتده فلا کته منجر اولدیغنی دویدنیغی زمان
 همان ایلری حرکتیه قرار ویرمش و ۱۲ تشرین اول آقشامی
 چرکس کوبینه کلمش ایدی. باش قوماندانلغنک ایلیک ایشی کرک
 تجمعه کی و کرک تعرض امری اعطاسینده کی خطالرک تولید
 ایتدکاری فلا کتدن متنبه اولارق اردویی همان ارکنه کریسنه
 چکمک وبوخطی تحکیم ایده رک تراکیایه مخصوص بالجمله قوتلرک
 ورودینه قدر بوراده مصرانه مدافعه یه قرار ویرمک اولاجقدی؛
 مع التأسف ینه عینی خطالر .. عینی حسابمزلق و تصادفه تسلیم
 نفس اتمک ...

باش قوماندانلق، شرق اردوسنک ارکنه کریسنه چکیلمسنه

پك راضی اولمق ایسته میوردی؛ برمدت ترددن صوگرا شرق اردوسی قوماندانلغك بوباده کی تکلیفنه نهایت موافقت ایتدیسه ده ارکنه خطنده مدافعه نك انزمیتته برقناعت قطعیه حاصل ایلمه مشدی. ایشته بو عدم اطمئنان لوله بورغاز محاربه سنك ظهورینه و نهایت بونك ده ضیاعته سبب اولمشدر : لوله بورغاز خطنه ککش اولان برنجی ، ایکنجی و دردنچی قول اردوسی قوماندانلری شرق اردوسی قوماندانك ارکنه کریسنه چکیلمکی مشعر و یردیکی امری موافق بولمایارق لوله بورغازده توقف و مقاومت ایچون دوغروجه باش قوماندانلغه مراجعت ایتدیلمر. باش قوماندانلق بالاده کی عدم اطمئنان حسبیه قول اردو قوماندانلرینك اشعارینی مصیب بولارق ارکنه خطنه چکیلمکدن واز کچدی . ایشته بوصورتله (لوله بورغاز) محاربه سی ده ینه بزم ایچون غیر مساعد شرائط تحتنده قبول و اجرا ایدیلدی. اکر بو محاربه عینی عسکرله ارکنه کریسنده اجرا ایدیلسه یدی ، دمیر یولنك وضعیت مساعده سی حسبیه ، عسکر نه آچ و نه جیبخانه سز قالمازدی . (لوله بورغاز) محاربه سنده کی مغلوبیتك باشدیجه سببی ارزاق و جیبخانه فقدانی اولدیغنه هیچ شبهه یوقدر .

کذا غربی روم ایلیده ده عینی تعرض امری اوزرینه وار . دار اردوسی (قومانووه) محاربه سنی و یریور و شرق اردوسنك عاقبتیه اوده دوچار اولیور . قرارگاه عمومینك ۳ تشرین اول تاریخلی تعرض امری کلدیکی زمان هنوز غرب اردوسنك همان

هیچ بر قسمی ایلری حرکت ایده جک بر حالدہ دکلدی .. یالکز،
احتمالاً امریرینی بولسون دییه، بش تشرین اولده فیروزویک
مفرزسنه (قورشوملی) استقامتندہ منفرد بر تعرض یاپدیریلدیسده
عدم موفقیتہ منجر اولدی . ۶ تشرین اولده صرب و بولغار
قطعائی متحداً ما کدونیا حدودینی تجاوز ایتدیلر؛ فقط بوکون
باش قوماندانلق ینہ تعرض امرینی تأکید .. واوستروما قول
اردوسیلہ وار دار اردوسنک متحداً تعرضنی امر ایتدی .
حال بوکه ۶ تشرین اولده وقوع بولان ایلری حرکاتی کوستر-
بیوردی که ، دشمن قوای فائقہ ایله (کوپرلی — اسکوب)
خطنہ دوغرو ایلرله مکده در . هیچ اولمازسه آرتق بو حرکتدن
صوگرا آییلارق وار دار اردوسنی یدی تشرین اول صباحندن
اعتباراً وار دار کریسنه چکمک، اسکوبی بر درجه یه قدر تحکیم
ایتمک ، صاغدن اوستروما قول اردوسنی اوسترومجه اوزرندن
کوپرلی یه وصولدن هیچ اولمازسه فیروزویک و ایپک مفرزه لرینی
اسکوبه دوغرو سربماً چکمک و تجمعه کی خطایی امکان نسبتندہ
تعمیر ایتمک لازمدی . قومانووه محاربه سنک اون بر تشرین
اولده وقوع بولماسنه کوره بو حرکت ایچون کفایت درجه ده
زمانده قالا جقمش .. فقط خایر عینی غفلت : هر نه اولورسه
اولسون، موفقیت یالکز تعرضک تأثیر سیحارنده آرانیلدی ...
غربی روم ایلی اردوسی قوماندانلقی باش قوماندانلق
۶ تشرین اولده کی امرینی حاله موافق و مصیب بولمش اولمالی که

اوستروما قول اردوسنه شماه دوغرو (دوبنیجه) استقامتمنده تعرض ایده رک واردار اردوسنک تعرضنه بالواسطه معاونت ایتمکی امر ایتدی. حال بوکه (دوبنیجه) استقامتمنده تعرضدن بر فائده استحصالی ممکن دکلدی. اکر واردار اردوسی قارشینسنده کی دشمن قوتلرینی منفرداً مغلوب ایده جک درجه ده قوتلی اولسه یدی، اوزمان مذکور اردو کوستدیل استقامتمنده ایلر لرکن اوستروما قول اردوسنک ده (دوبنیجه) استقامتمنده تعرضی موافق اولوردی. واردار اردوسنک ضعیفی محقق اولدیغندن اوستروما قول اردوسنک (دوبنیجه) به دوغرو تعرضی، قارشینسنده بولونان بر قاج بیک کشیلک بولغار مفرزده سیله اویالانماسنی انتاج ایده جک بولغار لر مقصد لرینه نائل اولاجقلردی؛ فقط بالعکس قره سینه بوغازی کی آز قوتله اوزون مدت مدافعه سی قابل بر بوغازه ضعیف بر مفرزه بیراقه رق قوچانه ویاشتیب استقامتمنده ایلرله سه یدی، دوغریدن دوغری به محاربه میداننده اشتراک تأثیر تأمین اولونوردی. هر حالده قوّه اصلیه اولان واردار اردوسی مغلوب اولنجه اوستروما قول اردوسی، مظفر بیله اولسه، ینه چکیلمکه مجبور ایدی.

حال بوکه، بو قول اردو نه غرب اردوسی قوماندانلغندن آلدیغی امری ایفا ایتدی؛ ونه ده کندیلکندن موافق بر سوق الجیش قراری ویردی. واردار اردوسی (صرب - بولغار) اردوسیله چارپیشیرکن او، بی حرکت، اوستروما وادیسنده

قالدی. بر میدان محاربه سی ویریلیرکن ایکنجی درجه ده اهمیتی
 حائز وظیفه لرك هپسی موقه اهمیتلرینی غائب ایدرلر. هرکس،
 امر آلسون آلماسون، او میدان محاربه سنک آل بیرلیکیه
 قازانیلماسنه سعی ایدر. طوب صداسنه قوشمق عصرلق بر
 قاعده حربه در. حال بوکه سالنیکک ستری کبی بی معنا بروظیفه
 اینه مکلف اولان اوستروما قول اردوسی (قومانووه) محاربه سنه
 لا قید قالدی؛ کویا بو محاربه، اجنبی ایکی اردو طرفدن باشقه
 بر مملکتده اجرا اولونیور و اوستروما قول اردوسنک بونیکه
 هیچ برعلاقه سی یوق ایدی.

قومانووه محاربه سنده پریشان اولان واردار اردوسی مناسیر
 استقامتنده چکیلدی. غربی روم ایلی اردوسی قرارگاهی ده
 نهایت سالنیکدن مناسیره کلک مجبوریتنی حس ایتدی؛ فقط
 باش قوماندانلق حالاسالنیکک سترینه بویوک بر اهمیت ویرییور؛
 چونکه بو شهرک اهمیت سیاسییه سی وارمش...

دها ۱۰ تشرین اولده یونان حدودنده مغلوب اولان
 مرتب سکیزنجی قول اردو سرفیجه یه چکیلمشدی. یونانلیلرک
 تقریبی اوزرینه تکرار رجعتیه بدأ ایدن بو قول اردویه ۱۴
 تشرین اولده سالنیکک اهمیتی اخطار اولونارق (یکیجه واردار)
 استقامتنده رجعتی امر اولونمش ایدی. عینی زمانده اوستروما
 قول اردوسنده همان یکیجه یه کلوب مرتب سکیزنجی قول
 اردویه التحاق ایتمی تبلیغ ایدیلدی. حال بوکه واردار اردوسی

پریشان اولارق پرلپه قذر کری چکیلنجه ، اوسترما قول اردوسی و مرتب سکزنجی قول اردو قطعاتنک سلانیک جوارنده مقاومتی غیر ممکن ایدی :

اولا بو ایکی قول اردونک مجموع قوتی آنجق ۳۰,۰۰۰ کیشی به بالغ اولمقده یعنی صورت عمومیده تسالیاده ایله یونان اردوسنک نصفدن دون مقدارده ایدی. ثانیاً واردار واستروما و ایلرندن متقارباً ایله یه جک بولغار قوتلری یکیکجهده مقاومته مأمور ایدیلن عثمانلی قطعاتنک آرقه سنی آلاچقوردی. ثالثاً سلانیکک قره جهتنده برحیظ مستحضر موجوددکلدی. شو شرائط تحتنده حالا سلانیکک محافظه سی قیدینه دوشه رک اردویی پارچه پارچه پریشان ایتدیرمکده هیچ بر معنایوق ایدی؛ بناءً علیه غرب اردوسی قوماندانلی بالذات مناسیره ناصل کلدیسه ، تکمیل قطعاتیده کندی اطرافنده طویلامالی و مناسیره تدارک اولونا بیله جک وسائطه نوعما بر مستحکم اردوگاه وجوده کتیرمکه چالیشمالیدی. شو حالده ۴۱ تشرین اولده مرتب سکزنجی قول اردونک کاملاً قباله چکیلیمی و استروما قول اردوسنکده کذا تکمیل اقسامیله کوکیلی اوزرندن مناسیره دوغرو جلب ایدیلمی لازمدی . مناسیره اطرافنده خطوط داخلیه استعمال ایده رک تعیبه مظفریتلری قازانمق و مقاومتی تمدید ایتک امکانی هر حالده موجوددی ؛ فقط سلانیکک ستری سوقالجیش تجمعهنده اولدینی کبی حرکات

حربىيە ائناسىندەدە قوتلىك توپلو توئولماسىنە، توپلاماسىنە مانع اوليور؛ وياخود يىكيجە محاربەسى دە غائب ايدىلەرک مرتب سىکنىجى قول اردو قوماندانى حسن تحسین پاشا اخيراً معيته التحاق ايدىن اوستروما قول اردوسىلە برابر يونانلىلەرە تسليم اولدى؛ وسترىنە او قدر اهتمام ايدىلن سالانىك ۲۶ تشرىن اولدە يونان اردولرىنە قاپولرىنى آچدى ... نتيجه: هم سالانىك قورتارىلامادى وهم اوتوزبىكە قىرىب بر قوتدن غرب اردوسى محروم قالدى! ...

داغىنقلىق وتشتت هر زمان، هر ىردە موجب ضعفدر .
مشاركت تأثير واتحادك بويوك قوتدر .

تعییه یه عدم وقوف

هنوز محارباتك صورت جریانہ متعلق تفصیلات صحیحہ میدانہ
 حقیقہ‌یاد یغدن دولایی تعییه خطالرینی اساسی بر صورتہ تدقیق
 ممکن دکلدر ؛ فقط همان هر محاربه‌ده اردو مزك حرکاتندہ تجلی
 ایدن بعض عمومی قصور لرله میدان محاربه لرینك غائب ایدیسنہ
 مهم تأثیر لر اجرا ایدن بللی باشلی خطالری انتباه ایچون، امکان
 نسبتندہ ذکر وتعداد قابلدر . ۵ تشرین اول آقشامی دشمن
 بعض اوافق تفك قطعاتیہ حدودی تجاوز ایتمش ایسه‌ده قوای
 اصلیه سیله ایلری حرکتہ آنجق ۶ تشرین اولده ابتدار ایتمش
 ایدی . اردو سوار یسنندن بر سواری فرقه‌سی « وایصال »
 جوارنده ومستقل لوا (خانلی یکیجه) طرفلرنده بولونیوردی .
 دشمن اردوسنك ایلری حرکاتی ائناسنده اردو سوار یسنك تدریجاً
 یانلردن برینه چکیلمسی قاعدہ عمومیه‌در . مخاصم اردو لر یکدیگرینه
 تقریب ایتدکجه سوارینك جهه‌ده ایشی یوقدر . بو آندن اعتباراً
 یقین کشف باشلار و بو وظیفه فرقه سوار یلرینه انتقال ایدر .
 اردو سوار یسی جناحلردن برینه چکیله‌رك دشمن جناحنی ویانی
 کشفه ، مناسب تعییه فرصتاری ظهورنده محاربه‌یه مداخله‌یه
 دقت ایدر ؛ محاربه‌نك ختامنده تعقیبه ابتدار ویار جعتی ستر
 ومحافظه وظیفه‌سنی در عهده ایلر .

(قرق کایسا - ادرنه) خطنده بولونان قطعاتک صول جناحی ادرنه قلعه‌سنه مستند ایدی . کرچه قلعه‌نک هنوتحکیماتی بیتمه‌مش ایدی ؛ فقط صحرا طویلریله مجهز برسیار اردویه قارشی اوزون مدت مدافعیه مقتدر بر حالده ایدی . بناء علیه اردو سوارینسک صاغ جناحه چکیلمسی لازم ایدی . بوندن باشقه عثمانلی اردوسنک پایتخت ایله مواصله‌سی صاغ جناحنه یقین بولونیوردی . بولغار اردوسنک قوه کایه‌سیله قرق کایسا اوزرندن و شرقندن کلمسی اغلب احتمالات ایدی ؛ بو حرکت بزه قارشی اک مؤثر و تهلیک‌لی اولاجغندن اردو سوارینسک بو جناحده بولونار ق دشمن حرکاتی ، جناحنک زهره قدر امتداد ایتدیکنی ، جناحده کی قولک نه قدر قوتلی اولدیغنی ، کریده قدمه‌سی بولونوب بولونما دیغنی کشف ایتمی الزم ایدی . حال بوکه ، اردو سوارینسنه حین حاجتده زهره چکیله جکنه دائر هیچ تعلیمات و یریه‌مش ایدی . مذکور سواری ایلرله ین دشمن قوللرندن ایکینسک حرکاتی طوبجیسیله تأخیر ایده‌ایده جنوبه دوغرو چکیله رک ادرنه قلعه‌سنک شرقه کلدی . اردو قوماندانندن تعلیمات آلمادیغنی حالده ، اردو سوارینسک کندیلکندن قرق کلیمانک شمالنه چکیلمسی لازم ایدی ؛ سوارینک زمانمزده صورت استیخدا منه دائر جزئی وقوفی اولانلر بولزومی تسلیمده تردد ایتزلر ؛ چونکه اردو سوارینسی هر حرکتی ایچون مافوقندن امر بکله مز ؛ بویله بر امرک زمان مناسبده ورودی اکثریا غیر قابلدر ؛ بناء علیه سواری

قوماندانلرینک دائما وضعیت عمومی نظر دقته آلارق امر
آلما دقلری حالده کندیلمکلمرندن سرعتله قرار ویرملری برقاعده
اصلیه در (سفریه نظامنامه سی - ۱۴۴ - صوک جمله) (سواری
تعلیمنامه سی - ۵۲۲) .

کرچه قرق کلیسانک شمال و شرقنده کی اراضی داغلقدر .
سوارینک حرکاتنه پک آلوریشلی دکلدر؛ فقط اردو سواریسینی
بو جهته کتیرمکدن . مقصد دشمن سواریسیله مصادمه ایتدیرمک
دکلدر . بر آزل اول تعداد اولونان وظائفی ایضا ایچون آنک
یورویه بیله جکی هر یول کافیدر . بالخاصه یایا محاربه ایله دشمن
قوللرینی توقیف ایچون بویله اراضی دهها مساعددر . ژاپون
سواریسنک (و افانغو) و (لیا او یانغ) میدان محاربه لرنده کی حرکتی
بو بایده اک یکی ایکی مثالدر . اکر اردو سواریسی قرق کلیسا
شمالنده بولونارق (قوفجناز - قرق کلیسا) یولنک ایکی طرفنده
یکرمی اوتوز کیلو متر دک بر منطقه یی ستر و ترصد ایتسه ییدی ،
هر حالده بولغارلرک بوجهتدن ناصل ونه قدر قوتله ایلرله دکاری
وقت وزمانیه آکلاشایر و اوچنجی قول اردونک ۱۰ تشرین
اولده قرق کلیسا جوارنده بوزولماسندن اجتناب ایدیلیردی .
شرق اردوسنک محاربه ایچون ۸ تشرین اول آقشامی
ویردیکی تعرض امری تدقیق ایدیلیرسه ، اردونک غایت واسع
بر جبهه یه داغیدیلدینی وهیچ بر نقطه ده دشمنه متفوق بر قوتله
ضربه قطعیه وورمق امکانی موجود اولمادینی کورولور . کرچه

ادرنه قلعه سندن چیقاجق قول اردونک معاونتیه دشمنک صاغ جناحه تعرض قطعی اجراسی آرزوسنده بولوندیغی و قرق کلیسا طرفدن یالکز دشمن قوتلرینی تثبیت و اشغال ایتک ایسته نیلدیکی بر درجه یه قدر حس اولونیورسسه ده امرک بو آرزوی موقع تطبیقه قویا مادینی محققدر . (سول اوغلی) چفتلیکندن طونجه شرقنده کی صیرتله قدر ۲۰ : ۲۵ کیلومتره لک بر جبهه یه اعظمی آلتمش بیک کیشی قوتنده اوچ قول اردو ایله تعرض ایدیلوردی . حال بوکه بو منطقه ده لا اقل دشمنک ۷۵۰۰۰ بیک قوتنده اوچ فرقه سی بولونیوردی . ایشته ضربه قطعی و وورولمق ایسته نیلن جناحده امرک تأمین ایتدیکی وضعیت بو حالده ایدی . حتی دردنجی قول اردو ایله ادرنه قلعه سندن چیقاجق قول اردونک آراسنده بویوجک بر آراق موجود اولدیغندن بونک او طرفده بولونان سواری قطعاتیله دولدورولماسی امر اولونمشدی .

بوندن باشقه مذکور امرده محرر عزیمت زمانلری ده قول اردولرک اشتراک حرکتی ، عینی زمانده محاربه یه کیره بیلملری تأمین ایدمیلوردی .

قول اردولرک کندیلرینه کوستریلن هدفله واصل اوله بیلملری ایچون قول باشلریله لا اقل ۲۰ کیلومتره لک یول یورومکه و بعده محاربه یه طوتوشالری لازم اولدیغندن عینی کونده هم بو یورویشک و هم محاربه نک اجراسی ممکن دکلدی . نتیجه تعین ایتهدن قارا کلق باصاجق ایدی . حال بوکه ، عسکر منک

حالیله کیجه محاربه سنک شراطی توافق ایتدیکندن بوندن ممکن اولدینی قدر اجتناب لازم ایدی .

قطعاتک قیمت حربیه سی مفقود وهیئت ضابطان صنوف ثلثه تمییه سنه غیر واقف اولدیغدن نه امر اولونان زمانده حرکت ونده یورویشلر ده انتظامی محافظه ممکن اولما مشدی؛ پیشدارلرک ترتیبانی هیچ بر صورتله مقصده وفا ایتمه یوردی . اراضیدن استفاده ایدیله یورودشمن طویجی آنشدن تحفظ ایچون اتخاذا ضروری تدابیر بیلنمه یوردی . بوتون بو وقوفسز لقلر بالخاصه تعرضده پک زیاده تلفات ویریله سنه سبب اولیوردی . بر محاربه نك آنجق صوک درجه ده غیرت وممانت صرف ایده رک و آل بیرلکیله چالیشوب یکدیگری نه معاونت ایله یه رک قازانیلاجغه هان هیچ کیمسه واقف دکادی . کیجه له ین محاربه ترتیباتنده بولونان قطعاتک نه صورتله کندیلمی تأمین ایتلمی لازم کلدیکنی هان هیچ بر قطعه قوماندانی بیلنمه یوردی . کرچه بونلرک هپسی تعلیم نامه لره وسفریه نطاه نامه سنده مندرج ایدی ؛ فقط بو قواعد آنجق کتاب صحیفه لرنده قالمغه محکوم اولمش و اوکره نلسنه ، تطبیق وتعلیم ایدیله سنه وقت حضرده اهمیت ویریله مشدی .

بو بجز یکسز لکمز ی کورده دشمن ، آقشام قارا کلنی با صدق دن صوکر ا بر کیجه باصقینی یا پهرق عثمانلی اردوسنک اک ایی ، اک معلم قطعه سی ظن اولونان ایکنجی فرقه نر زنده پانیک حصوله کتیر مش بوده هان تکمیل قطعاتک کری قاچاسنه سبب اولمشدی .

احوال مذکورہ قارشیسندہ شرق اردوسی قوماندانانی ،
 بو عسکرله تعرض ایدیله میه جکی ایچون اردونک (قرق کلیسا -
 یکیجه) خطنه چکیلمسنی واوراده مدافعه ایتمسنی امر ایتمشدی .
 ۱۰ تشرین اول صباحی تکمیل قول اردولر بو امری اجرا
 ایدرکن صاغ جناحده بولونان اوچنجی قول اردو ، وضعیت
 عمومیه بی هیچ نظر دقه آلمیه رق منفرداً تعرضنده دوام
 ایدیور . وکویا دیکر لرینک کری چکیلمه سنی تأمینه چالیشیوردی .
 حال بوکه سائر قطعاتک کری چکیلمه سی اوزرینه یالکز قالان
 اوچنجی قول اردویه دشمن قوای فائقه ایله یوکه نهرک هجوم
 ایتمش وقره حصار فرقه سنده حصوله کلن پانیک تکمیل قول
 اردویه سرایت ایدرک قرق کلیسانک مدافعه ایدیله مه مسنه ،
 (قرق کلیسا - یکیجه) خطنک طوتولاماسنه و تکمیل شرق
 اردوسنک (بیکار حصار - لوله برغوس) خطنه قدر پریشان
 بر حالده ، طوپنی تفنکنی براقارق رجعتنه ، عادتاً قاجاسنه سبب
 اولمشدر . اکر اوچنجی قول اردو آلدینی امری ایفا ایدرک
 علی الصبح قرق کلیسایه چکیلمسه و بو موقعک مدافعه سنی تنظیم
 ودرعهده ایتمسه یدی هنوز محاربه ایله مغلوب اولماش اولان
 شرق اردوسنک (قرق کلیسا - یکیجه) خطنده مقاومتنه امکان
 بولونوردی ؛ بالاخره آکلاشیلدینی اوزره دشمنک حرکات
 حربیه پلانی خطالی اولوب یالکز ادرنه یه قارشی اوچ فرقه افراز
 ایتمش اولدیغندن (قرق کلیسا - یکیجه) خطنه قارشی آنجق

۱۰۰,۰۰۰ کیشی ایله تعرض ایده بیاه جکدی. حال بوکه مذکور خطده بولوناجق شرق اردوسی لاقول (۸۰,۰۰۰) کیشی قوتنده اولاجغندن بر قاچ کون وقت قازانمق ممکن اولا - جقمش . . . کرچه سفر برک و تجمعمز فنه ، اصـوله موافق جریان ایتمدیکندن بو مدت ظرفنده جدی قوای امدادیه آله میه جقدی . فقط هیچ اولمازسه قرق کلیسای تخیلیه ویا اوراده بر پلونه وجوده کتیرمکه امکان وزمان بولوناجقدی ؛ هیچ اولمازسه رجعتک منتظماً اجرایی وکلیتی طوب و تفسکی ، مهمات و ارزاقی یوله بیرا قارق قاچانک اوکی آلتیدی . ۱۱ و ۱۰ تشرین اول کونلرنده طوبیحیلر منک - چاموره صاپلاندى بهانه سیله - قوشوم قوللرینی کسه رک طوبلری بیراقوب قاچدقلرینی کیزله مکه لزوم یوقدر .

شرق اردوسی (پیکار حصار - لوله بورغاز) خطنه کلدیکی زمان ، بو خطده می قالنه جنی یوقسه (ارکنه) تریسنه می چکیلنه جکی برمدت تردد و مناقشه بی موجب اولمشدی . بومسئله اساساً بویوک قوماندانلرک بینلرنده حل اولوناجق برشی ایدی . دشمن قارشیسنده ایکن هر دورولان یرده دائماً تحکیمات یا بمق برقاعده اساسیه در . حتی برکیجه لک موقت بر توقف اولسه ، حتی محاربه میداننده اون اون بش دقیقه لق بر آرا مدت بیله عبارت اولسه ینه دیزچو که رک ویا یره یاتارق آتش ایتمکه مخصوص بر - - پر وجوده کتیرمک قاعده قطعیه در . بویابده

تعلیمانه لرده صراحت لازمه واردر ؛ فقط کیم اوقویورکه بو صراحتی خاطرنده طوتسون. براقچ کون تمادیا شرق اردوسی (لوله بورغاز) جوارنده توقف ایتدیکی حالدده همان هیچ برقطعه برمدافعه خطی انتخاب و تحکیم ایتمه مشدر. دکل آوجی خطلری استناد و احتیاط برقطعه لری بیله دشمنک نه نظر ونه آتشدن مستور دکل ایدیلر . بولوک و طابور قوماندانلری بویوک قوماندانلر آراسنده کی مناقشه یه قایلار ق کندیلرینه تعلق ایدن ایشلری یامیورلر و دوردقلری یرده برقطعه لرینه تک تأمین سلاحتی ایچون برپارچه طوپراق قازدیر میورلردی. (لوله بورغاز) محاربه سنده اکثری قطعات هیچ محاربه یه کیرمه مش ایکن صرف تستر ایتمه مک ، دشمن آتشدن تحفظ ایچون اراضیدن استفاده ایتمه مک ، سپر قازمامق یوزندن دشمن طویجی آتشنک تأثیر یله ضایعاته دوچار اولمشلر وقوه معنویه لری بهوده یره منکسر اولارق رجعت ایتمشلردر. مشارکت تأثیر، معاونت متقابله کی شیلره هیچ بر اهمیت و یر یله یوردی . برفرقه دشمن ایله جدی بر صورتده محاربه ایدرکن یانی باشنده دیگر برفرقه قارشیسندده دشمن اولمادیغندن دولایی اوطوریور وقومشوسنه معاونتی خاطرینه بیله کتیرمه یوردی .

حتی ایکنجی قول اردو، لوله بورغاز محاربه سنده، کندیسندن صورت مخصوصده طلب اولونان معاونتی بیله دریغ ایتمشدر . صحرا طویجیلری ، سریع آتشی مالزمنک اک بویوک

فأده سنه ، مستور موضعن آتش خصوصنه اهمیت ویرمه یور -
 لردی . یالکز کلیتی جبخانه صرف ایتمکله ایش کوره جکلرینی
 ظن ایدیور لردی . جبخانه نك قلتنی ، جبخانه نقصاتی ا کمال
 ایچون همان هیچ بر ترتیبک موجود اولمادیغنی دوشونمه یور لردی .
 آچیق موضعن انداخت یوزندن بالخاصه لوله بورغاز محاربه سنده
 صحرا طوپچیلر منک پک چوق ضرر کورمشلر و ایکنجی قول
 اردونک طوپچیسى ، دردنجی و بشنجی آایلر همان کلیاً اورتادن
 قالمشدر : بو حال دشمن طوپچی آتشنک تأثیریه قسماً ضایعا .
 تدن و قسماً طوپ بندروب کری چکیلمه نك عدم امکانه حکم
 ایدیلرک طوپلرک موضعه بیر اقیلماسندن ، طوپار لاکلرک باشلرینی
 آلوب کیتمه سندن تولد ایتمشدر . کذا (لوله بورغاز) محاربه سنده
 سوازی فرقه منک بجزیکسزلکی دشمن سواریسنک جرأتی
 آرتدیرمش و بوسوازی اردو منک صول جناخنده کوزکشدی ؛
 بناء علیه ، بوجناحی تأمین ایچون سیدلر جوارینه بر مفرزه
 کوندریلدی ؛ بوکا الحاق اولونان و ایکنجی آایه نسوب اولان
 طوپچیلر بر قاق مرمی آتدقن صوکر دشمن سورایسی کلیور
 دییه ، پیاده قطعاتی بیراقوب درت نعل ایله دوغرو چورلیده
 صولوغی آلمشدر . قسم اعظمی موظف افراددن مرکب
 اولان طوپچیلر منک بوجالی ، بودرجه متانت وفدا کارلقدن
 محرومیتلری شایان دقتدر . بووقایع شیمدییه قدر اک منتظم
 واک چوق چالیشیور ظن اولونان و صنوف مختلفه ایچریسنده

اڭ زیاده کووه نیلن بر صنف ایچون هر حالده بویوک بر لکه در .
 حربک ایکنجی دورنده ده احوال تعییویه برنجی دورده
 کندن همان هیچ فرقلی دکدر . ایکنجی دورک اڭ مهم محاربه سی
 اولان بولایر محاربه سنده دشمن تعقیب ایتمدیکی حالده بر جبل
 باطاریه سی طوپنک برینی بیر افارق قاچمشدر . حال بوکه رجعت
 آنلرنده طوپ بیلرک اڭ مهم وظیفه سی کمال متانتله ثبات ایدوب
 دشمنی طوپ آتشیله توقیفه چالیشمقدر . تعلمینامه آنجق بو
 اوغورده طوپلرک ضیاعنی بیله بر شرف تلتی ایدر . حال بوکه
 دکل ثبات ایتمک ، بر آن اول کری کیتمک ایچون طوپلر ترک
 اولومشدر .

بولایر محاربه سنده ده مهم بر تعییه خطاسی محاربه نك ضیاعنه
 سبب اولمشدر . شارکوی جوارنده قره یه اخراج اولونا جق
 ۱۰نجی قول اردو ایله بولایرده کی قول اردو او حوالیده کی
 دشمن قوتلرینه قارشى متحداً حرکتیه و تعرضه مأمور اولمشدر .
 ۱۰نجی قول اردونك اخراج حرکتی ۲۶ کانون تانی صباحی بدأ
 ایده جکدی . اخراج اثناسنده بولایرده کی قول اردو ، اخراج
 حرکتی تسهیل ایچون قارشیننده کی دشمنه تعرض ایده رک
 اونى تثبیت و اشغال ایده جکدی . ایکی فرقلی اردونك اخراج
 حرکتک اڭ مکمل و سائطله لا اقل اوچ کون سوره جکی
 و آنجق دردنجی کون ایلری حرکتیه ایتدار ایدیله بیله جکی
 اوتدن بری معلوم و مجرب بر قاعده حربه در . بولایرده کی قول

اردونک یالکز ایلك كونی دشمنی تثبیت و اشغالی ایچون تعرض ایتمسی وبعده اونجی قول اردونک ایلری حرکتیه حاضر اولماسنی متعاقب برابرجه تعرض قطعی یه ابتدار ایتملری لازم ایدی. ایلك اخراج كونی قرهیه چیقان قوت اوندن سوکراکی اخراج حرکاتنی بالذات تأمین ایده بیلیردی؛ فقط بویله یاپیلمادی؛ بولایرده کی قول اردو یالکز باشنه نتیجه قطعیه استحصال ایتمک، مظفر اولق هوسنه دوشدی. اونجی قول اردو ایله مشترکاً اجرای تأثیره انتظار ایتمدی. ده ۲۶ کانون نانیسه اشغال محاربه سی رینه تعرض قطعی اجرا ایتمدی ونهایت پریشان اولدی: ذاتاً بر تعرضی موفقیتله اجرا ایچون اقتضا ایدن قیمت حربیه دن عسکر محروم، ارکان، امر او وضا بطان ایسه محاربه میداننده ال بیر لکیله ایش کورمک و دشمن قارشیسنده فیه موافق تدابیر اتخاذ ایتمکدن عاجز اولدیغدن بونواقص عددله تلافی ایتمه نیجه موفق اولمانک امکانی یوقدی. بونقطه لر نظر دقه آلمادیغدن اوکله وقتی، هنوز اونجی قول اردودن، آنجق ایکی طابور قریه اخراج ایدیش ایکن، بولایر قول اردوسی یوزده اللی یه قریب ضایعاتله تکرار بولایر خطنه رجعت ایتمش ایدی. بوندن سوکرا بولایر خطنک بیله مدافعه سنده عاجز قالدیغنی مین فریادلری اونجی قول اردونک تکرار واپورلره ارکابنه و بولایرک امداینه قوشدیر یلماسنه سبب اولدی

(آلمان - فرانسه) حربنده (له تون غامبه تا) نک، تشکیل

ایتدیکی یوزبیکلرجه وطن فدائیلرندن مرکب جمهوریت
 اردولرینک - محضاً تعلیم و تربیه فقدانندن دولایی - آلمان
 اردولری قارشیسینده ارییوب محواولدیغنی کورونجه، سویلهش
 اولدیغنی شوسوز نه قدر معنیداردر :

Les grands succès ne s'improvisent pas.»

بویوک موفقیتلر اولجه چالیشوب حاضر لایمقسزین
 قازانیلاماز . «

لینس للانسان الاماسعی

اردوده معنویاتک فقدانی

عبدالحمید دورینک اک بویوک فناقلرندن اولمق اوزره اردوده و ملتده هر نوع خواص جنکاورانه اولدورولمشدی . بواوزون دورمشوم افراد ملتده براویوشوقلق، برجرأتسنزک یالکیز کندی شخصی دوشونمک و هرشیدن اورکمک کبی بر حالت ماده و روحیه وجوده کتیرمشدی . بالقان حزینی اجرا ایدن عثمانلی اردوسنک همان کافه افرادی هپ بودورده یتیشمش اولدیغندن عزمسزک، غیرتسنزک، عدم جرأت و فقدان متانت اردونک اوصاف مخصوصه سنی تشکیل ایدیوردی . ۱۳۲۴ انقلابندن بری کذرار اولان درت سنه مذکور نقایص رو- حیهی ازاله یه کافی دکلمدی ؛ بونکله برابر جدی همت ایله بر درجه یه قدر تنقیص ممکن ایکن بو جهتده اهمیت ویرمدک . بوتون فناقلر عبدالحمیده اسناد ایدیلدیکندن یالکیز اونک - اسقاطیله ، حریتک استردادیله هرشی اولاجق نطنه دوشدک ؛ فقط بش سنه لک تجربه کوستردی که ، فناغک بویوک بر قسمی بزده ایمش . . .

علوه همت، عز و وفراط غیرت صاحبی ذواتی ایش باشنه کتیره رک لاینقطع اردویی حرب ایچ-ون چالیشدیرمغه اردوده مادیاتله برابر معنویاتی تزئیده دقت اولونمادی؛ قاراقته رسز ، سنجیه سنز

انسانلرک ، غیرت و همتدن محروم اشخاصک تأثیرات مضره سنی ازاله ایچون تدابیر شدیدہ اتخاذ اولونمادی . قطعاتک قومانداسنه وقت حضرده مأمور ایدیلن ذواتک اکثریسی آرتق زمانک طلب ایتدیکی درجهده ایش کوره جک حالده دکل ایدیلر . حتی بونلردن بعضیلرینک اقتدار وغیرتن محرومیتلری پک آشکار اولدیغندن دولایی آرتق سفر برلرک ابتداسنده قسماً انصاف ایدیلهرک محاکمات دائره سنه وسائرہ یه نقل ایدیلک صورتیہه فنا لگ اوکی آلمغه چالیشیلدی ؛ فقط بوتدیبرده هم ناقص وهم پک کیچ اولدیغندن برثمره مفیده حاصل ایدمه دی ؛ بالخاصه یکی کان ذوات هیچ طانیما دقاری ، بیلمدکلری بر قطعه ایله دفعه حربه کیرمک مجبوریت مضره سنده قالدقلرندن دولایی بوتدیبر بعض فناقلرده حصوله کتیرمشدر .

اردوده عبدالحمید زمانندن مدور او یوشوقلنی ازاله وبر آرز شوق وغیرت حصوله کتیرمک ایچون شاعر لر مزک ، بسته کارلر مزک وجوده کتیر دکاری محصوللر بیله سونوک ایدی : میدانه قونان مارشلر ، وطن شرقیلری وسائرده دایما تحفظ ، دایما مدافعه فکرلری موجود ایدی ؛ حال بوکه مدافعه یی ، وقوع بولا جق تجاوزه قارشى محافظه نفسی دوشونمک ، بوکا راضی اولمق اساساً دشمنک تفوقنی تسلیم ایتک واونی آزوب قهر ایله مکدن واز کچمک دیمکدر . مملکتک سیاستی هر نه اولورسه اولسون ، ملتک واونک قهرمانلقجه برتمالی اولان اردونک مغنویاتی تزیید

ایچون دایما ایلرله مکی ، حدودك او بر طرفنده بولونان املرله
 دوغرو قوشمنی ایجاب ایتدیرن آرسلان مفکورهلر ، بونی
 استحصال ایچون ایجاب ایدرسه اولمکی تلقین ایدیجی شرقیلر ،
 مارشلر یایمق لازمدر . بوتون اردونك ، افراد ملتك بویله
 آرسلان بویومسی ، بویله مارشلرله شوق وهیجانله کلمسی ،
 خواص جنکاورانه سنی یکیدن احیا وتزید ایتیمی اقتضا ایدر .
 اردوده عاداتا ، دیزکینلری بیراقیلنجه ، زنجیرلری چوزولونجه
 دره ، تپه ، داغ و دکنیز دیمه یه رك قوشاجق ، ایلرله یه جك ، خصمنی
 راست کلدیک یی یرده تارومار ومحو ایده جك بر آرسلان حالت
 روحیه سی بولونمالیدر ؛ حال بوکه وطن شرقیلری دایما طوقات
 و ورولدیغی زمان مدافعهدن ، ملی مفکورهلر دایما آلدله بولونان
 شیلری قایدیرمقدن بحث ایدیورلردی . بوصورتله اردونك
 مغنویاتی تزیدر ایدیله مزدی . بز او یوشوق دورورکن وبالاخره
 تحفظدن بحث ایدرکن بولغارستانده شاعرلرک افراد ملتنه تلقین
 ایتمک لرینی آکلامق ایچون بولغارلرک وطن شرقیلرندن و مارشلرندن
 بعضیلرینی بروجه آتی عیناً ترجمه ایدیوروز :

« قانه بویانمش مریچ حوموردانارق آقیور ؛

« یوره کی یارالی طول قادین آغلا یور ؛

« ای سوکیلی جنکاورلر ! بوتون قوتتمزله یورویه لم ؛

« بالقان قهرمانی بزم قوماندانمزددر :

« لهوسکی [*] نك آرسلا نلی سنه جانلی آچمش ،
 « مظفر اولمغه کیدیور ؛ قهرمان عسکرلر ارقه سندن قوشیورلر ؛
 « بونلرک شرقیلری کوك یوزینی چینلاتیور .
 « قهرمانلر ایلری ، قوماندان بزمه برابر ؛
 « استانبول بزم اولاجق ؛ هایدی ! مارش ایلری !
 « جسور محارب ، ظفر بزمدر . »

§

« جنوبده کی مملکتلره دوغروایلر له مک واردو کاهنی استانبول پیشکاهنده
 « قورمق ایچون قهرمانلرک انتظار ایتدکلری کون کلدی .
 « بوتون ملت آیاغه قلقق ! ای فداکارلر هایدی محاربه یه !
 « بزه عاڈ اولان یرلری حیات بهاسنه ضبط ایچون غوغا
 ایده جکیز .
 « آرتق کری کیمک یوق . بزاجداد مزکی محاربه ایده جکیز ؛
 « ألمزده سونکو اولدیغی حالده سنه جاق آلتنده اوله جکیز ؛
 « شدیقه کچیدلرنده بابالر مزك اولدکلری کی اوله جکیز ؛
 « هی قهرمانلر ! مارش ! جنوبده کی مملکتلره دوغرو
 ایلری ... »

§

[*] (لهوسکی) حریت ایچون چالیشان بر بولغار پاپاسی اولوب
 ۱۸۷۳ ده صوفیه ده حکومت عثمانیه طرفندن آسیامشدر . شیمدی
 آصیلدیغی یرده هیکلی بو خاطر اتی احیا ایتکده در .

« ترک ماتی ! تیتره ! چونکه بزکایورز .
 « باق ترا کیا اووالری حسابسز قهرمانلرله دولدی .
 « وقتیه یاپدیغمنز کی ، شیمدی ده استانبول سورلرینه قدر
 ایلزله یورز .

« هایدی قارداشلر هممز بیرلکده دشمنی ازمک ایچون
 کیده لم .

« او عصر لرجه بزم مملکتتمزی تخت اسارتده طوتدی .
 « شیمدی آرتق تلافی زمانی کلدی ، محاربه نقاره لری بزی
 غوغایه چاغیری یورلر .

« قوتمزه اولان اعتماد یوره کلر منزی قیزدیرمالی که ، داغلر
 « آرقه سنده کی قارداشلر منز ایچون صلح وسعادت قازانالم .»

§

« هی ادرنه ! فورطنه سورلر که تقرب ایدیور .

« سنک صوک اسارت کونک کلدی .

« بزم قوتمز دشمنی مغلوب ایتدی .

« سکا حریت ویوم سعادت کتیریور .

« بز یاناشیق صیرالرله سکا یاقلاشیورز ،

« سن بزی چیچکلرله ، شرقیلرله قارشیلایورسک .

« ترکار بزم مملکتتمزدن قاچیورلر ؛

« روز کار اونلری سوپوروب کوتوریور ؛

« و آرتق کوزل بالقانی بوندن صوکرآ آنجق رؤیاده

کوره جکلر ! . . . »

بر زمانلر استانبولدن قالقوب ویانه سورلرینه قدر کیدن اردولر مزده یالکمز مدافعه، تحفظ فکری بولونسه یدی بودرجه علوهمتلر کوسترملری، بش آلتی قرالغی ازوب قهرایده بیلملری بونلرک وجودلرینی خریطه عالمدن سیلملری ممکن اولابیلیرمی ایدی؟

بز ایکی عصری متجاوز بر زماندن بری غایت مدهش بر سقوط ایله یووارلاقمده یز. او زماندن بری اجرا ایتدی کمز حربلرک همان هپسنده مغلوب اولدق. بومتوالی مغلوبیتلر نتیجه سنده تدریجاً (بودايشته) دن (میدیه - اینوز) خطنه قدر چکیلمکه مجبور اولدق. اردومزده بونسبتده کیتدکجه قیمتی غائب ایتدی. بعض ظاهری همتلره رغماً بوکونکی اردو کچن «عثمانلی - روس» حربی یاپان اردودن بیله قیمتجه دون مرتبه ددر. بالقان حربنده نه مکرر شیبیه هجوملری، نه هیچ یوقدن وجوده کتیریلن پلونه مدافعهلری ونهایتده ارزاق توکنتجه روس اردوسنی یاروب کچمک تشبثی و نده زیوین محاربهلری کچی قهرمانقلر یوقدر. بالعکس عزم و متانتدن محرومیتده دلالت ایده جک پک چوق مثاللر موجوددر :

۹ تشرین اول کیجه سی شرق اردوسی قوماندانلغی (قرق کلیسا - یکیکجه) خطنه چکیلوب مدافعه امرینی ویرمش ایدی. صباحلین یکیکجه جوارنده کی صیرتلرده دوران شرق اردوسی قرارگاهک نزدینه برنجی قول اردو قوماندانی کله رک «پاشام

بو عسکرله حرب اولماز ؛ استانبوله یازیکزده حربدن واز
 چسونلر ؛ یوقسه بنی بو خدمتدن عفو ایدیکز « دیمشدی .
 اردو قوماندانی « حرب زمانی استعفا اولماز ؛ هایدی قول
 اردو کزک باشنه کیدیکز « جوانی ویرمش ایدی ؛ فقط قول
 اردو قوماندانی قول اردوسنک طوتاجنی موقعی انتخاب وتعیین
 ایدوب کلن قطعانی قارشیلایارق یرلرینی کوستره چکی و غیر
 منتظم چکیلن عسکرینی دورمغه و اعاده انتظام ایتمه اجبار
 ایده چکی یرده، اردو قومانداننک صریح امرینه رغماً، قواقلی یه
 دوغرو کری یورویشنه دوام ایتدی . حالبوکه ایکی کون اول
 عینی محله ، قواقلیده شرق اردوسی قوماندانی « نه دور یوروز ؛
 نه ایچون تعرض ایتمه یوروز ؛ شو کویلولرک هجرتنه جان دایانیرمی ؟ »
 دین و تعرضه تشویق ایدن ینه مشارالیه اولمشدی . اولکی تعرض
 حرصی ایله صوکرکی متانتدن محرومیت قابل توفیق میدر ؟
 عینی قوماندان لوله بورغاز محاربه سنده ده بوچشید غربتله اظهار
 ایتمشدر . بوندن باشقه مذکور محاربه نك دها ایلك کوننده
 دردنجی فرقه ترك موضع ایتمش ایدی ؛ فرقه قوماندانیه بر
 آلائی قوماندانی عسکری توقیف و تکرار بونی ایلری ایتک
 ایچون هیچ برتشدنه بولونمامشدی . ایکنجی قول اردو قو-
 مانداننک اخطار شدید اوزرینه داغنیق عسکرلری طویلامغه
 باشلامشله سه ده کیجه قارا کلغندن بالا استفاده کوزدن غائب اولارق
 ساقز کوینده بولونان اردو قرارگاهنه کیتمشله و شرق اردوسی

قومانداننه چای پیشیرمکه اشتغال ایتمشردر. عجبیا کندیلکنندن
 بلا امر کری چکیلن ، قاچان ایکنجی فرقه ، ایزمیت فرقه سی ،
 قره حصار فرقه سی ، دردنجی فرقه ، بشنجی فرقه ، جاناقلعه
 فرقه سی وسائرہ کبی لایعد قطعاتک درجات مختلفہ دہ کی بالجملہ
 قوماندانلری عسکری توقیف ومقاومتہ اجبار ایچون صوک
 غیرتلینی صرف ایتمشلمیدی ؟ [*]

« حرب صیتی برانضباطک وجودینی وبوتون قوای مادیه ومعنویہ .
 نک صرف واستعمالنی مستلزمدر . خصوصیہ محاربه دہ تحصیل ظفر
 وغالبیت بالجملہ ضابطان وافراد عسکریہ نک قوماندان اقدس عمومی
 « اولان ذات حضرت پادشاهی ایله وطن وملت اوغورنده شوق ایله
 « فدای جان ایتملرینه و اک کوچوکه قدر بالجملہ رتبه اصحابنک بالذات
 « اعمال فکر ایله اقتضای حالہ کوره کنندی کندینه تدابیر اتخاذینہ
 « آکشمش اولمالرینه ونفرانک دخی احراز ظفر عزم قطعینسنه مالک
 « ومافوقلرک مجروحیت ویا شهادتلیری حالندہ بیله بو عزمی خللدار
 « ایتمک اوصافی حائز بولونمالرینه متوقفدر - پیاده تعلیمنامہ سی - ۲ »
 « رجعتہ مجبوریت حاصل اولورسه بوتون قوماندانار
 « ضبط و ربط و انتظامک محافظہ سی ایچون قاعدہ اساسیہ
 « اولارق کنندی قطعہ لری نزدندہ قالیرلر . یالکز باش قوماندان
 « تدابیر اولیہ نی اتخاذ وتدابیر مذکورہ نک اجرا قلنه جنی حقتدہ
 « امنیت حاصل ایتدکنن صوکر ا تدابیر سائرہ مقتضیہ نی احضار
 « ایتمک اوزره کری یہ کیدر - پیاده تعلیمنامہ سی ۲۹۳ » .

[*] یالکز بشنجی فرقه قوماندانی بالذات روولور چکه رک عسکرک
 آراسنده اوغراشمش و او میآندہ شهید اولشددر . ۳ و ۱۷نجی قول
 اردولرک قوماندانلری دہ بوخصوصده بالذات ابراز فداکاری ومثانت
 -ایتمشردر .

کورولیورکه تعلیمنامه نك بیاناتی رجعت اثناسنده بالجمله ضابطانك صوك درجه ابراز متانت و فداکاری ایتسی حقنده پك قطعیدر. عجا بوکا نه درجده رعایت اولونمشدر ؟ برآز اول سرد ایدیلن مثالرله تعلیمنامه قواعدی توافق ایدیورمی؟ حاصلی قانلی تجربهلر اثبات ایتدی که اردوده قوای مادیه نك قیمتسزلکنندن ماعدا قوای مغنویهده متزلزل ایش ؛ بعض نادر سیالری تجیل ایله استثنا ایتدکن صو کرا بویوک، کوچوک اکثریت متانت وقدا کارلقدن محروم ایش ؛ بناء علیه شاعرلرمز، بسته کارمز ، رساملرمز ، بابالرمز ، قارداشلرمز ، آنهلرمز همشیره لرمز بوتون افراد ملته متانت وانتقام تلقینی ایچون تکمیل وسع واققدارلرینی صرف ایتملیدرلر . بودوکولن قانلرک ، هدر اولان ناموسلرک ، کسین معصوملرک انتقاملرینی پك یقین زمانده بالفعل آلمق ایچون ملتک خواص جنکاورانه سنی اوینادیرمالیدرلر. متزلزل طینتلیری، غیرت وقدا کارلق خواصندن محروم سیالری جنکاورانه پیشوالق ایده جک هیئت آراسندن آییقلامالی .

آرتق هرپاشا ، هرآمر ، هرضابط وظیفه عشقی ایله معلول اولمالی ؛ وظیفه ناموس ومسلکنی تقدیر ایتملی ؛ آرتق « نه ایچون شویاییلمایور ؛ بودولته اتفاق ایدیله یور ؛ نه ایچون فلان ناظر اولمش ، فلان والی اولمش » دیمکی قطعاً سویللمره بیراقمالی ؛ یکرمی نفری تربیه ایله مشعول اولمنی ، ایکی تعبیه

مسئله‌سی حل ایتمی ، بر قاج تطبیقات یانمغی ترجیح ایتمغلی ؛
غزته‌لرده بر بند سیاسی‌یی، فلسفه‌یه وسائر‌یه متعلق بر کتابی
اوقومقدن زیاده ، تعلیمنامه‌لرک ، فن حربه متعلق رسائلك
مطالعه‌سندن ذوق آلمغه چالیشمالیدر .

اردونك با‌لخاصه هیئت ضابطانك کنج ، اختیار با‌لجمله قوتلری
داخلی سیاستك زبونی اولاجغنه ، استلافجیلق ، اتحادجیلق بیلمم
نه‌جیلک جریانلرینه صرف ایدیله‌جکنه کاملاً بوقوتلر حدود
خارجنده بولوناجق ملی برکعبه آماله متوجه اولمالی ؛ شبقه‌یی
ضبط ایتمک ، بالقانلری حدود یانمقده سلانیک استرداد ایتمک ،
آطه‌لری قورتارمق کبی عمومی ومقدس مفکوره‌لرک استحصالی
ایچون صرف ذهن وقوت ایتمغلی ؛ هر پاشا ، هر آمر ، هر ضابط
علی‌الصباح اوندن چیقارکن قهووده اوطوراجغم ، قشله‌ده
اوطوراجغم ، دأزده اوطوراجغم دیمه‌مغلی ؛ ایش کوره‌جکم ،
چالیشاجغم ؛ بوکون یاپدیراجغم تعلیمانه ، کندی معلوماتی تزید
ایچون اوکرده‌جکم شیلرله مقدس وملی مفکوره‌نک استحصالنه
برآدیم ده‌ها یاقلاشاجغم دیمغلی ؛ واقشام دوندیکی زمان ، مستریح
البال ، «اوت بوکون کورولن ایشلرله هدفه برآدیم ده‌اتقرب
ایتدک» دیمه بیلمه‌لیدر ؛ بویله موفقیت‌تأمین ایده‌مدیکنه وجداناً
حکم ایتدیکی کونلر ایچون بایانغی متأسف اولمالیدر .

ایشته آنجق بویله اساسلی ، جدی چالیشیرسه‌ق مملکتی
محقق بر سسقوطدن قورتارابیلیرز . ایلری آتیلغنه ، تجاوز

ایتمکه حاضر لانتقله ، بو خصوص ایچون وقت حضرده مادی
 و معنوی چالیشمقله سلامت ممالکتی تأمین ممکندر؛ آمین اولمالی که،
 کائناتده موازنت ، سکونت موجود دکلدر ؛ آنجق حرکت ،
 ایلری ویا کری کیتمک واردر . ایلری کیده مهین بهمه حال
 کری کیدر . ایلری کیده بیلن ، بو یولده حاضر لانان آنجق
 سلامتی تأمین ایده بیلیر . « حاضر اول جنکه ایستر ایسه ک صلاح
 و صلاح » دستورینک معنای حقیقیسی بودر . کندیسنده بودرجه
 چالیشمق ایچون قوت و اقتدار کوره میهنلر ، آرتق سلامت
 وطن ایچون یرلرینی اهل اولانلره ترک ایتمه لیدر لر .

صوک

